

## Mapabaxutoje San Pablo cotocaevi toyaquina Corinto tomarapijivijavabelia

*Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi*

<sup>1</sup> Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi tatsipaebinexa pexanialivaisi. Vajabananë Timoteo xanëjavata ponapona. Nexata pacatoyaquinatsibeje mapalivaisije Dioso panejumecovënëtsivi, paCorinto tomarapijivimë. Patoyaquinajëbejenua mapalivaisije Acaya nacuajava pejinavanapaevi ata. <sup>2</sup> Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

*Pacuenia Pablo navajunupaeba itsamonae pebejiobiaexanaejavatsi yabara pelivaisi*

<sup>3</sup> “Ayaicuenia panejamatabëcueneyavenoname,” pajanë vaxa Diosojavabelia. Bajara-ponë Dioso, vajatuxanenë Jesucristo paxa. Dioso, vajanacaitaxutotsoniataenë, vajanacajamatabëcuenebabatsinë bitso vajanajamatabëxainaeyaniva. <sup>4</sup> Pamatacabi panetocopiapatabiaba daxita xua bitso panenajamatabëxainaeya exanaejitsia,

itsiata Dioso panejamatabëcuenebabatabiaba bajaraxuavecua. Bajara pijinia pacuenia paxanë ata panejamatabëcuenecaëjêpa itsamonae juya patajamatabëcuenebabatsinexa pamatacabi bajarapamonae ata tocopiapatatsi xua bitso najamatabëxainaeya exanaejitsiatsi.

<sup>5</sup> Itsamonae bitso panebejiobiaexanabiaba Jesucristo patajumecovënëtsixae. Nexata pijinia Jesucristo pejamatabëcueneta Espiritu Santo panejamatabëcuenebabatabiaba bitso patanajamatabëxainaeyaniva. <sup>6</sup> Nexata paxanë itsamonae itsa panebejiobiaexanabiaba, Dioso panejamatabëcueneyavenonabiaba patanejamatabëcuenebabatsinexa. Nexata paxanë ata panejamatabëcuenecaëjêpaena juya itsamatacabi paxamë patacjamatabëcuenebabatsinexa itsa pacatocopiapata xua bitso pacanajamatabëxainaeya exanaejitsia. Nexata itsa pacajamatabëcuenebabatsianatsi, bajayajebi pajamatabëcuenesaëmë tsane Dioso panejumecovënëtsijava matapania Dioso papecacapanepaejavabelianexa. Paxamë ata raja itsamonae pacabejiobiaexanabiabiana.

<sup>7</sup> Payapëtaniji baja cajena paxamë ata Dioso papecacapanepaejavanexa. Pacuenia paxanë itsamonae panebejiobiaexanabiaba, bajarapacuenia paxamë ata itsamonae pacabejiobiaexanabiabiana. Nexata paxamë ata itsamonae itsa pacabejiobiaexanabiabiana, Dioso pacajamatabëcuenebabatabiabiana panevajënaeyabelia paneajamatabëcuenesaënexa Dioso panejumecovënëtsijava. Bajarapacuenia Dioso pacajamatabëcuenebabatabiabiana matapa-

nia Dioso papecacapanepaejavabelianexa.

8 Tajamonae, pajitsipajë paxamë ata paneyapëtaenexa itsamonae Asiavënë nacuata patanebejiobiaexanabiabijava. Ayaicuenia bitso panebejiobiaexanabiaba. Nexata baja picani pasaëjibinë tsaponae. Apo panecaëjëpae baja picani patavajënaeyabelia pataponaenexa. Nexata pajamatabëjumaitsinë tsabiabi: “Patëpaenajë meta baja rovia,” pajamatabëjanë tsabiabi. 9 “Pepacuene raeta baja panebeyejebiana,” pajamatabëjanë tsabiabi. Dioso baja cajena panetocopata bajarapacuenia itsamonae patanebejiobiaexanabiabinexa. Nexata paepatota panebejiobiaexana patajamatabëjumaitsinexa mapacueniaje: “Xanë tajacuata apo necaëjëpae tavecuapanepaenexa mapacuenije. Matapania Dioso neyavenonaena, necaëjëpaena tavecuapanepaenexa mapacuenije,” patajamatabëjainexa. Dioso caëjëpatsi pataneyavenonaenexa. Tsipaji baja cajena Dioso pematacotsinë petëpaevi ata. 10 Dioso baja panecapanepa itsamonae patanebejiobiaexanaejavata patanebeyaxuabiyanima. Icatsia bajarapacuenia itsamonae itsa panebejiobiaexanaena, Dioso icatsia panecapanepaena. Bajaraponëjavabelia panajamatabëcuenecopatajë bajarapacuenia pataneyavenonabiabinexa. 11 Paneyavenonaeyavajëtaponaename Diosojavabelia bajarapacuenia Dioso pataneyavenonabiabinexa. Paayaibitsaëtoخانetomë itsa panetovajëtaponaename Diosojavabelia, nexata Dioso paneyavenonabiabiana. Nexata pijinia jivi ayaibitsaëtoخانeto paxanë yabara jumai tsabiabi

tsane Diosojavabelia: “Pexaniacuene bitso toexaname Pabloana. Ayaicuenia yavenoname pebeyejebiyaniivatsi,” jai tsabiabi tsane.

*Pajamatabëcuene yabara Pablo apo ponae Corinto tomarabelia yabara pelivaisi*

<sup>12</sup> Itsa pajinavanapajë daxitajivijava, paxamëjava ata, xaniavaetsia pajinavanapajë Dioso pitabarata. Itsa pajinavanapajë paxamëjava, pibisiacuene apo pacasivanajamatabëxainaetsi. Bajaraxuata panasivajamatabëcuenebarëyanë. Paxanë raja saya mapanacuapijilivaisita apo panejamatabëcuenyavenonae xaniavaetsia patajinavanapaenexa. Dioso raja patanejamatabëcuenyavenonaexae, bajarapacuenia xaniavaetsia pajinavanapajë. <sup>13</sup> Palivaisianë baja pacatoyaquinabiabatsi, caelivaisita anijajamatabëcuenelivaisibeje apo xainaponae. Palivaisianë pajumetaneme itsa palebame patacatoyaquinaelivaisianë, bajarapalivaisianë saya caejamatabëcuenelivaisi xainapona. Pematatsënëa itsajamatabëcuenelivaisi apo xainaponae. Pacatojitsipatsi xaniavaetsia panejumeyapëtaenexa palivaisianë pacatoyaquinatsi. <sup>14</sup> Pacatojitsipatsi xaniavaetsia patanejamatabëcuenyapëtaexamë. Tshipaji abaxë xaniavaetsia apo panejamatabëcuenyapëtaemë pacuenia pajamatabëcueneitsinë tsavanapae. Nexta pamatacabi vajatuxanenë Jesús icatsia patianica, paxamë panesivajamatabëcuenebarëyamë tsane. Bajara pijinia pacuenia paxanë ata pacasivajamatabëcuenebarëyatsi tsane.

15 Nexata xanë pacasivajamatabëcuenejumaitsitsi mapacueniaje: “Corinto tomarapijivi baja cajena xaniavaetsia nejamatabëcueneyapëtane. Yapëtane pacuenia apo sivanajamatabëxainaenë itsajamatabëcuene bajarapamonaejavabelia,” pacasivajamatabëjaiti. Bajaraxuata picani jamatabëpatajê paxamëjavata patanesivajamatabëcuene barëyanexamë itsa patajê paxamëjavata. 16 Pamatacabi ponajê Macedonia nacuayabelia, talianë picani jamatabëpacataeponatsi bajaraxuayo. Bajaraxuacujinae icatsia tanaviatsinërena jamatabëpacataeponatsi picani icatsia bajaraxuayo. “Bajarajota bajarapamonae neyavenonaena tajanamutonexa, Judea nacuayabelia taponaeenexa,” pacasivajamatabëjaiti picani. 17 Pacuenia najamatabëxainabiabajê taponaeenexa itsajavabelia, ponabiabajê baja cajena. Itsiata aeconoxae bajarapacuenia apo exanaenë taponaeenexa paxamëjavabelia. Mapanacuata itsamonae najamatabëxainae ata itsacuenejavayo pexanaenexa, itsiata apo exanabiabi. Bajarpacuenia itsiata xanë apo jamatabëcueneitsinë. Paxamë baja cajena panecueneyapëtaneme. 18 Dioso ata panecueneyapëtane apo patacayamaxëitojorobicuene. Dioso baja cajena pejumelivaisi pacatsipaebabiabatsi. Nexata icatsia xuacujinae bajarapalivaisi itsa pacatsipaebabiabatsi, saicayalivaisicuenia icatsia apo pacatsipaebabiabitsi. 19 Xanë Pablonë, Silvano, Timoteo, bajarapamatabëxëyo, pacatsipaebabiabatsi Jesucristo, Dioso pexënato, pelivaisi. Bajaraponë Jesucristo

caejamatabëcuene xainabiaba. Nexata pacuenia jumaitsi, xaniajai tsabiabi. <sup>20</sup> Jesús pejamatabëcueneta Dioso baja daxita nacatoexana pacuenia tajëvelia najumecapanepaeya jumaitsi vajanacatoexanaenexa. Bajaraxuata Diosojavabelia vajavajëtsijavata itsa jumaitsitsi: “Diosomë, bitso ayaijamatabëcuenenëmë,” itsa jaitsi, nexata Jesucristo pejamatabëcueneta jumaitsitsi.

<sup>21</sup> Dioso pacajamatabëcueneyavenonapona panevajënaeyabelia paneajamatabëcuenesaënexa Cristojavabelia panenajamatabëcuenecopatsijava. Bajarapacuenia paxanë ata Dioso panejamatabëcueneyavenonapona. Dioso nacaitapeta Jesucristo pijajivinexatsi, Dioso pijacuene vajatonacuenebavanapaenexa. <sup>22</sup> Dioso raja Espíritu Santo nacatsijamatabëcaeyaexana. Nexata nayapëtanetsi Dioso pexicuenetsi. Bajaraxuata yapëtanetsi pepacuene xaniajai Dioso vajanacacapanepaejavanexa.

<sup>23</sup> Mapacuenia pacajumaitsitsije Dioso pitabarata. Dioso baja cajena nejamatabëcueneyapëtane. Pamatacabi picani jamatabëponabiabajë paxamëjavabelia, caecuenia itsa ponaejitsipajë, nexata pacabijataejitsipatsi. Tsipaji abaxë apo paexanavanapaemë patacaitorobicuenia. Bajaraxuata abaxë apo navecuaponaenë paxamëjavabelia, itsa pacabijatanetsi, bitso panenajamatabëxainaeyaniva. <sup>24</sup> Nexata apo jitsipaenë icatsia patacatsipaebaponaenexa paneyapëtaenexa pacuenia bepaexanavanapame. Tsipaji baja xaniavaetsia Dioso pajumecovënëtavanapame. Jamatabëpacayavenonatsi. Pacuenia baja pajamatabëcuenebarëyamë

tsavanapae, matatoxenetsia icatsia paneja-  
matabëcuenebarëyanexa Dioso pitabarata.

## 2

<sup>1</sup> Najamatabëcopatajë baja taponaejava  
paxamëjavabelia. Tsipaji jamatabëjumaitsinë  
paxamë yabara mapacueniaje: “Apo ponaenë  
abaxë tsane Corinto tomarapijivijavabelia  
tanajamatabëxainaeyaexanaeyaniva bajara-  
pamonae,” jamatabëjanë. <sup>2</sup> Paxamë ita  
pajamatabëcuenebarëyamë, nexata xanë ata  
pacasivajamatabëcuenebarëyatsi tsabiabi. Itsiata  
itsa pacanajamatabëxainaeya exanaejitsipatsi,  
nexata apo pajamatabëcuenebarëyamë  
tsipae. Nexata xanë ata apo pacasivaja-  
matabëcuenebarëyatsi tsipae. Tsipaji ajibi  
tsipae patacasivajamatabëcuenebarëyajanexa.  
<sup>3</sup> Bajaraxuata taponaevajënaeya paxamëjavabelia  
copiata baja cajena pacatoitorobaliatsi  
itsabaxuto, patacatoyaquinaebaxuto.  
Bjarapacuenia pacatoyaquinatsi tsipaji  
abaxë apo jamatabëponaenë paxamëjavabelia  
patacasivanajamatabëxainaeyaniva, ita  
pacatanetsi panejinavanapaejava apo  
patacaitorobicuenia. Jitsipajë picani paxamë  
patacasivajamatabëcuenebarëyanexa. Paxamë  
yabara jamatabëjumaitsinë mapacueniaje:  
“Corinto tomarapijivi baja cajena neja-  
matabëcueneyapëtane. Bjarapamonae ita  
jamatabëcuenebarëya, xanë ata bajarapamonae  
sivajamatabëcuenebarëyanë tsabiabi,”  
jamatabëjanë. <sup>4</sup> Apo jitsipaenë picani  
patacatoyaquinaenexa bajarapabaxuto.

Itsiata itsa pacatoyaquinatsi, nuajë pax-amëjitsia. Najamatabëxainajë cajena bitso tajamatabëëthëtovetsina. Apo pacatoyaquinaetsi raja saya patacanajamatabëxainaeya exanaenexa. Ayaicuenia raja patacaasivajava patanejamatabëcueneyapëtaenexamë, pacatoyaquinatsi.

*Pacuenia Pablo itoroba Corinto tomarapijivi barajamatabëcuenexanepanaeya baja petaenexa pibisiacuene pexanaponaponanemi yabara pelivaisi*

<sup>5</sup> Ponë pibisiacuene exana, caenënë xanë apo nenajamatabëxainaeyaexanae. Daxita paxamë ata bajarapacuenia pacanajamatabëxainaeyaexana.

<sup>6</sup> Ponë yabara itsabaxutota pacatoyaquinatsi, paxamë baja cajena najamatabëcuenjëpaeya panavecuaitavetame bajaraponë, pibisiacuene pexanaenë, penapatsiyaniva panenacae-tuatsijavata. Nexata baja bajaraponë belia copata pibisiacuene pexanaejava. Xanepana rabaja. Pëtsa baja pematatsënëa icatsia panavecuaitavetame bajarapacuenia.

<sup>7</sup> Aeconoxae baja pajamatabëcuenecaevare bajaraponë pibisiacuene pexanaejava. Pabaramatabëcuenexanepanare baja. Bajaraponë juya pajamatabëcueneyavenonaename piaurayaniva. Bajarapacuenia pajamatabëcueneyavenonaename pejamatabëcuene matatoxenetsiyanivatsi bitso pejamatabëcuenebëjajjava pijaneconi yabara. <sup>8</sup> Bitso pacatojitsipatsi panetsitanajamatabëcueneitajëtsinexa paneasivajava bajaraponë. <sup>9</sup> Nexata pabaxuto copiaya

pacatoyaquinatsi, bajarapabaxuto pacatoy-  
 aquinatsi saya patacajamatabëcueneëjësina.  
 Jitsipajë xaniavaetsia tayapëtaenexa ita  
 panejumecovënëtsijitsiamë daxita pacuenia  
 pacaitorobatsi. <sup>10</sup> Nexata baja aeconoxae  
 ita pajamatabëcuenecaevame papibisiacuene  
 bajaraponë exana paxamë tuatuajëta, xanë  
 ata baja jamatabëcuenecaevajë bajaraponë  
 pibisiacuene pexanaejava. Xanë baja  
 jamatabëcuenecaevajë paneconi bajaraponë  
 exana xanëjavaberena. Jamatabëcuenecaevajë baja  
 bajaraponë pibisiacuene pexanaejava, daxita  
 paxamë aneconijibia jamatabëcuenebarëyaya  
 panejinavanapaenexa Cristo pitabarata.  
<sup>11</sup> Jamatabëcuenecaevatsi baja papibisiacuene  
 bajaraponë exana vaxaitsijavaberena. Tsipaji  
 vaxaitsi ita apo jamatabëcuenecaevitsi tsipae  
 bajarapapibisiacuene pexanaejava, vaxaitsi  
 ata dovathi nacayamaxëitojorobijitsipa. Vaxaitsi  
 baja dovathi cueneyapëtanetsi, xua exanabiaba  
 vajanacacopabiaexanaenexa Dioso pejumelivaisi  
 vajajumecovënëtsijava.

*Pacuenia bitso Pablo Tito sivanajamatabëxaina  
 yabara pelivaisi*

<sup>12</sup> Patajopajë Troas tomarata tatsipaebinexa  
 Cristo pelivaisi. Troas tomarata tapatsivajënaeya,  
 taniji Dioso tanetoxanepanaeyaexanaejava  
 tatsipaebinexa pejumelivaisi bajarapatomarata.  
 Nexata Troas tomarata ita tsipaebabiabajë  
 Dioso pejumelivaisi, Troas tomarapijivi  
 nenamuxunaevetabiaba xaniavaetsia.  
<sup>13</sup> Itsiata baitsi jane bajarajota abaxë apo

jamatabëcuenebarëyanë. Najamatabëxainajë vajabananë Tito yabara. Tshipaji abaxë Tito apo caxitajarabaxuabinë Troas tomarata. Nexata baja napëjibajë Troas tomarapijivi taponænexa baja Macedonia nacuyabelia.

*Pacuenia Cristo nacajamatabëcueneyavenona yabara pelivaisi*

<sup>14</sup> “Pexaniacuene rabaja panetoexaname,” pajanë Diosojavabelia, Cristo pejamatabëcueneta Dioso patanejamatabëcuene yavenonabiabixae. Itsajavabelia itsa paponajë, Dioso paneyajavaponabiaba. Panejamatabëcueneyavenonabiaba pacuenia Dioso jitsipa pataexanaenexa. Panejamatabëcueneyavenonabiabanua itsamonaejavabelia xaniavaetsia patatsipaebinxæ Dioso pejumelivaisi. Pamonaë jumecovënëta bajarapalivaisi, tsitapexanialivaisitsi bitso.

<sup>15</sup> Dioso sivajamatabëcuenebarëyatsi pajivi itsamonaejavabelia tsipaeba Cristo pelivaisi. Paxanë ata Dioso panesivajamatabëcuenebarëya. Tshipaji patsipaebabiabajë Cristo pelivaisi daxitajivijavabelia. Itsamonae baja jumecovënëtapona Cristo pelivaisi Dioso pecapanepævinexatsi. Itsamonae pijinia apo jumecovënëtsi Cristo pelivaisi Diosovecua penaxuabivinxæ.

<sup>16</sup> Pamonaë Diosovecua naxuabiana apo pejumecovënëtsixæ Cristo pelivaisi, naxuabiana. Pamonaë pijinia Dioso capanepænatsi pejumecovënëtsixæ Cristo pelivaisi, capanepænatsi. Paxanë, paapóstolevinë, Dioso paneyavenonabiaba.

Nexata panejamatabëcuenecaëjëpa patat-sipaebabiabinexa pexanialivaisi, Cristo pelivaisi, jivi pecapanepaelivaisinexatsi. <sup>17</sup> Pacuenia itsamonae tsipaebabiaba Cristo pelivaisi ëpematamotsinexatsi, paxanë apo paitsinë. Biji rajane itsajamatabëcuene ata apo pasivanajamatabëxainaenë jivijavabelia itsa patsipaebabiabajë Cristo pelivaisi. Dioso baja cajena panejamatabëcueneyapëtane. Dioso paneitoroba Cristo patatonacuenebinexa.

### 3

*Pacuenia Dioso pejanalivaisi najumeca-panepaeya jumaitsi jivi pecapanepaenexa yabara pelivaisi*

<sup>1</sup> Itsa pacanavajunupaebatsi paneyapëtaenexa Dioso patanitorobijava Cristo pelivaisi patacatsipaebinexa, paayaijamatabëcuenevinë apo panataenë. Itsamonae pata paxamëjavata penajumetsënëtsilivaisi papecatsipaebinexa beDioso pejumelivaisicuenia. Bajarapamonae pacatocapata cuyalato itsamonae petsicobeyaquinaebaxutotsi. Bajarapabaxutota pacatoyaquina: “Dioso raja pejumelivaisi pepaebivi,” pejailivaisi. Bajaraxuata xaniavaetsia pacopiapitame bajarapamonae. Itsiata baitsi jane paxanë itsa papatajë paxamëjavata, apo pacarajutsitsi itsamonae patanetsicobeyaquinaecuyalato. “Pablo raja apóstolenë,” pejailivaisi itsamonae patanetsicobeyaquinaebaxuto, apo pacarajutsitsi xaniavaetsia patanecopiapitsinexamë. Apo panamatavenonaenë paxamë ata

cuyalato patanetsicobeyaquinaenexamë  
 patacaponaenexa itsamonaejavabelia  
 bajarapamonae pataneyapëtaenexa xaniavaetsia  
 patanecopiapitsinexa. <sup>2</sup> Bajarapacuenia  
 cuyalato apo panamatavenonaenë patacapon-  
 aenexa jivi pataneyapëtaenexa xaniavaetsia  
 patanecopiapitsinexa. Tsipaji baja jivi  
 yapëtane xaniavaetsia Jesucristo pelivaisi  
 patacatsipaebixae panenajamatabëcuene  
 pënëyorotsijava Diosojavabelia pibisiacue  
 paneexanabiabijavamivecua. Nexata jivi baja-  
 rapamonae yapëtanenua Dioso patanitorobijava.  
<sup>3</sup> Paxamë xaniavaetsia panejumecovënëtame  
 patacatsipaebilivaisi, Jesucristo pelivaisi.  
 Nexata itsamonae, apo pataneyapëtaevi ata, itsa  
 pacavënëlivaisitane patanejumecovënëtsijavamë,  
 panesivajamatabëjumaitsi: “Pablobana Corinto  
 tomarapijivi cuyalato apo tsicobeyaquinae atatsi,  
 itsa jume, ibopanata ata apo tsicobeyaquinae  
 atatsi vajayapëtaenexa, itsiata yapëtanetsi Dioso  
 pitorobijavatsi pexaniajailivaisi, Jesucristo  
 pelivaisi, jivi petsipaebavanapaenexa,”  
 panesivajamatabëjai. Piasaëtsaponaponaenë  
 baja cajena Espíritu Santo pacatsijamatabëeca.  
 Nexata baja pacajamatabëcuene pënëyorota  
 pejanajamatabëcuene panexainaenexa. Nexata it-  
 samonae xaniavaetsia itsa patsitajinavanapame,  
 bajarapamonae ata baja pacayapëtane Cristo  
 pelivaisi papecatsijamatabëecaejava.

<sup>4</sup> Paxanë payapëtaniji Dioso patanitorobijava  
 pepacue Cristo pelivaisi jivi patatsipaebavana-  
 paenexa. Tsipaji baja Dioso paneyavenonabiaba  
 Jesucristo pejamatabëcueneta. <sup>5</sup> Paxanë

patasaëta Dioso patatonacuenebinexa, apo panejamatabëcuenecaëjëpae. Nexata xua Dioso patoexanavanapajë, Dioso baja cajena paneyavenonabiaba. <sup>6</sup> Dioso panejamatabëcueneyavenonabiaba patatsipaebabiabinexa itsamonaëjavabelia Dioso najumecapanepaeya pejanalivaisi pejumaitsijava jivi peca-panepaenexa. Bajarapamonaëjavabelia apo pajumaitsinë tsabiabi: “Pajumecovënëtavanapare Dioso Moiséspijinëta penajumecopatsilivaisi. Itsa apo pajumecovënëtsimë tsane, nexata panaxuabianame,” apo pajanë tsabiabi. Biji rajane jivi patsipaebabiabajë pacuenia Espíritu Santo jamatabëcueneasaëyaexanaejitsiatsi. Palivaisi bajayata Dioso Moiséspijinëta najumecopata, itoroba pebeyaxuabinexatsi pajivi apo jumecovënëtsi bajarapalivaisi. Itsiata baitsi jane pajivi jumecovënëta papejanalivaisi jivi patsipaebabiabajë, Espíritu Santo pesaëta jamatabëcueneasaëyaexanaponatsi.

<sup>7</sup> Bajayatami Dioso Moiséspijinëta najumecopata. Bajarapalivaisi Dioso yaquina ibopanabejumata. Bajarapalivaisita Dioso itoroba pajivi apo jumecovënëtsi bajarapalivaisi pebeyaxuabaponaenexatsi. Bajarapacuenia Dioso Moiséspijinëta itsa najumecopata bajarapalivaisi, Moiséspijinë itabaranivenivena bitso. Nexata Israelpijinë pemomoxi apo itabaranaëcotsicapanepaetsi. Itsiata baitsi jane bajaraxuacujinae itsamatacabianëjavabelia, itabaracotiacaevapona baja. <sup>8</sup> Palivaisi bajayata Dioso Moiséspijinëta najumecopata, xanepana baja picani caepatoyonexa saya.

Bajarapalivaisimi matatoxenetsia bitso xanepana papejanalivaisi mapamatacabitaje jume-covënētavanapatsi Dioso vajanacacapanepaenexa. Bajarapacuenia Dioso nacacapanepaena Espíritu Santo vajanacatsijamatabëcaexae daxitamatacabijavabelianexa. <sup>9</sup> Bajayata Dioso Moiséspijinëta najumecopata. Nexata bajarapalivaisi xanepana. Tsipaji bajarapalivaisi pejamatabëcueneta, jivi yapëtane Dioso penaneconitsiaexanaejavanexatsi pibisiacue ne pexanaeneconi yabara. Itsiata baitsi jane bajarapalivaisimi matatoxenetsia bitso xanepana papejanalivaisi pejamatabëcueneta Dioso nacacapanepaejitsia. Bajarapapejanalivaisi pejamatabëcueneta, Dioso baja aneconijibia nacatane. <sup>10</sup> Palivaisi bajayata Dioso Moiséspijinëta najumecopata, xanepana baja picani. Itsiata baitsi jane palivaisi Dioso cotocaevi najumecopata, bajarapalivaisi bitso xanepana. Bajaraxuata palivaisimi copiaya Dioso najumecopata Moiséspijinëta, aconoxae baja nacatsitaajumematamobi. <sup>11</sup> Palivaisi copiaya Dioso Moiséspijinëta najumecopata, xanepana picani caepatoyonexa saya. Biji rajane palivaisi cotocaevi Dioso najumecopata, bitso xanepana. Tsipaji daxitamatacabijavabelianexa bajarapalivaisi tsitecaena.

<sup>12</sup> Payapëtaniji papejanalivaisi Dioso cotocaevi najumecopata bitso pexanepanaejava. Tsipaji daxitamatacabijavabelianexa apo vereverecae tsane bajarapalivaisi. Bajaraxuata apo pajumejunavabiabinë bajarapalivaisi patatsipaebinexa jivijavabelia. Palivaisivajëto

payapētaniji, patsipaebabiabajē jivijavabelia.  
<sup>13</sup> Bajayata Moiséspijinē yapētae ata livaisi. itsiata xaniavaetsia apo tsipaebi pijajivijavabelia. Itsiata paxanē bajarapacuenia apo paitsinē. Bajayata Moiséspijinē itsa itabaranivenivena, naitabaraacata papaëbërëpanata. Bajarapacuenia naitabaraacata pijajivi, Israelpijinē pemomoxi, pitabarataeyanivatsi bajarapacotia pecaevaponaejava. <sup>14</sup> Itsiata baitsi jane bajarapamonaejavabelia Moiséspijinē tsipaebi ata, apo jumeyapētaetsi pajamatabëcuenelivaisi yabara tsipaeba. Bitso ajamatabëcuenetaja bajarapamonaemi. Nexata apo jumeyapētae palivaisi tsipaebatsi. Bajara pijinia pacuenia ajena mapamatacabijavaberena ataje, tsiteca abaxë ajamatabëcuenetaja bajarapamonae pemomoxi ata. Bajarapamonae penacaetuatabiabibota, itsa lebabiaba Dioso Moiséspijinëta penajumecopatsilivaisimi, apo jumeyapētaeyabiabi pajamatabëcuenelivaisi xaina. Bajarapamonae itsa jumecovënëtsipa Cristo pesivatëpaejavatsi, nexata matapania jumeyapētaejitsipa pajamatabëcuenelivaisi xaina palivaisi bajayata Moiséspijinē tsipaebabiaba. <sup>15</sup> Ajena mapamatacabijavaberena ataje, judíovi penacaetuatabiabibota itsa lebabiaba Dioso Moiséspijinëta penajumecopatsilivaisimi, apo jumeyapētaeyabiabi pajamatabëcuenelivaisi xaina. Bitso ajamatabëcuenetaja bajarapamonae. <sup>16</sup> Itsiata baitsi jane pajivi najamatabëcuenecopata vajatuxanenē Jesucristojavabelia, bajarapajivi Dioso vecuaajibiaexanatsi pibisiacue pexanaeneconimi. Nexata bajarapajivi xani-

avaetsia jumeyapētane pajamatabēcuenelivaisi xaina palivaisi bajayata Moiséspijinē tsipaebabiaba. <sup>17</sup> Vajatuxanenē Jesucristobeje, Espíritu Santobeje, najamatabēcuenējepabeje. Jesucristo pejamatabēcueneta Espíritu Santo ponapona vajajamatabēēthētota. Nexata Espíritu Santo nacajamatabēcueneyavenonapona pibisiacuene vajaexanaeyaniva. <sup>18</sup> Nexata Jesucristo pejamatabēcueneta, Espíritu Santo nacayavenona. Nexata pacuenia Moiséspijinē jivi vecuanaitabaraacata pitabaracotiataeyanivatsi pitabaranivenivenaejava, bajara vaxaitsi apo itsitsi. Biji rajane tsitanacueneitajëtsiaya jinavanapatsi xaniavaetsia jivi peyapëtaenexa Dioso ayaijamatabēcuenē pexainaejava. Espíritu Santo nacajamatabēcueneyavenonapona vajavajënaeyabelia pejanajamatabēcuenē vajaxainaponaenexa. Nexata pacuenia Jesucristo jamatabēcuenëitsi, bajara vaxaitsi ata vajajamatabēcuenëitsinexa.

## 4

<sup>1</sup> Dioso baja cajena patanitaxutotsoniataexae, panetocopata patatsipaebabiabinexa jivijavabelia pexanialivaisi, Jesucristo pelivaisi. Bajaraxuata itsajavata panetsiayai tsabiabi ata, itsiata apo pajamatabēcopatsinë patatsipaebabiabijava Jesucristo pelivaisi. Tsipaji baja Dioso panetocopata bajarapacuenia. <sup>2</sup> Muetsia apo paexanaenē itsacuenejava ata. Apo paexanaenē daxita xua piauracuene ata. Jivi patayamaxëitojorobinexa, itsacuenejava ata apo paexanaenē. Apo patsipaebabiabinënu

saicayalivaisi Dioso pejumelivaisivecua. Dioso baja cajena yapètane jivijavabelia epexaniajailivaisi patatsipaebabiabijava. Patanejumetaeyenaevi ata bajarapacuenia jumai tsipae. <sup>3</sup> Itsa patsipaebabiabajë jivi pecapanepaelivaisinexatsi, jumenapebetsiaya patsipaebabiabajë xaniavaetsia patanejumeyapëtaenexa. Nexata patsipaebi atanë, pajivi apo jumecovënëtsi bajarapalivaisi, bajarapajivi pijacuata nanaxuabiaexanaena Diosovecua. Nexata bajarapajivi daxitamatacabijavabelianexa, Diosovecua naxuabiana. <sup>4</sup> Bajarapacuenia apo jumecovënëtsi tsipaji dovathi pejamatabëcueneta ajamatabëcueneitaquiriayaexanatsi pejumecovënëtsiyaniva bajarapalivaisi. Bajarapapexanialivaisi, Cristo pelivaisi, bepiniijicotia jivi pejamatabëcueneitayotsinexa itsa jumecovënëta bajarapalivaisi. Nexata dovathi, mapanacuapijivi pijatuxanenë, apo jitsipae bajarapalivaisi jivi pejumecovënëtsinexa pejamatabëcueneitayotsiyanivatsi. Cristo paxa Dioso jamatabëcuenejëpa. Nexata pacuenia Dioso jamatabëcueneitsi, bajara Cristo ata jamatabëcueneitsi. <sup>5</sup> Livaisi itsa pacatsipaebabiabatsi, paxanë apo panalivaisipaebabiabinë pataneyaiyataenexamë. Biji rajane vajatuxanenë Jesucristo pelivaisi pacatsipaebabiabatsi. Paxanë saya panataniji bepanijajivinë. Jesucristo bitso pajitsipajë. Bajaraxuata paxamë ata jamatabëpacayavenonatsi. <sup>6</sup> Bajayata Dioso mapanacuaje itsa exana, pitaquirijavata pitayotsinexa, itoroba juameto penaexanaenexa. Bajara pijinia pacuenia

paxanë ata patajamatabëcueneaitaquirijavami, Jesucristo pelivaisi ita pajumecovënëtajë, Dioso panejamatabëcueneitayota. Bajarapacuenia ita panejamatabëcueneitayota, payapëtaniji Dioso bitso ayaijamatabëcuene pexainaejava. Jesucristo ita itabaranivenivena Dioso pexënatoxae, paxa Dioso jamatabëcueneitajëta Dioso bitso ayaijamatabëcuene pexainaejava.

*Pacuenia Dioso jamatabëcuene yavenona pijajivi, ita tonacuenebavanapatsi, yabara pelivaisi*

<sup>7</sup> Paxanë Dioso patanejamatabëcueneitayotsivi ata, pataperabëto apo ajamatabësaë. Pacuenia atsavaxi bajayajebi apo ajamatabësaë, bajara saya itsi. Pataperabëto apo paperabësaë atanë, Dioso pataneyavenonaexae, pajamatabëcuenesaënë tsavanapae. Nexata bajarapacuenia pataajamatabëcuenesaë tsavanapaejava patanetaevi, jamatabëjumai tsane paxanë yabara: “Mapamonaeje ajamatabëcuenesaë tsavanapae Dioso pesaëta,” jamatabëjai tsane. <sup>8</sup> Nexata panetocopiapatabiabi ata itsacuene patanetoyapëbejecuene, itsiata Dioso paneyavenonabiaba patavecuapanepaenexa bajarapacuenia. Apo payapëtaeyabiabi atanë pajamatabëcuene yabara panetocopiapata patanetoayapëbejecuene, itsiata paxanë apo pacopatsinë Dioso patajumecovënëtsijava. <sup>9</sup> Itsamonae panebejiobiaexanabiabi ata Dioso patajumecovënëtsijava yabara, itsiata Dioso apo panecopatsi patajaepato. Itsamonae irata panepenetabiabi ata patanebeyejebinexa picani, itsiata pepacuene apo panebeyaxuababiabi

Dioso pataneyavenonabiabixae. <sup>10</sup> Pacuenia Jesús pijavajabitsaë bajayajebi picani jamatabëbeyaxuababiabatsi, bajarapacuenia paxanë ata Jesús papijajivixaenë, itsamonae jamatabëpanebejejobabiaba picani. Itsiata apo panebejejobicanepae. Bajaraxuata daxita jivi yapëtane Jesús pataneyavenonabijava. <sup>11</sup> Daxitamatacabi patajinavanapaematacabianë, panetsiayai tsabiabi itsamonae patanebejejobinexa Jesús papijajivixaenë. Bajarapacuenia panetocopiapatabiaba jivi pataneyapëtaenexa Jesús pataneyajavaponaponaejava. <sup>12</sup> Panetsiayai tsabiabi itsamonae patanebejejobinexa patacatsipaebabiabixae papecacapanepaelivaisinexa Diosojavabelia. Nexata paxanë patacatsipabilivaisi panejumecovënëtsixae, itsamatacabi athëbëtatsia Dioso pacarajutsiana matacabi apo peverevereaejava.

<sup>13</sup> Dioso pejumelivaisibaxutota jumaitsi mapacueniaje: “Jumecovënëtajë Dioso taneyavenonaejavanexa. Bajaraxuata tsipaebajë jivijavabelia Dioso taneyavenonaejavanexa,” jai. Bajara pijinia pacuenia paxanë ata pajamatabëcueneitsinë. Pajumecovënëtajë Dioso pataneyavenonaejavanexa. Bajaraxuata patsipaebabiabajë jivijavabelia Dioso pataneyavenonaejavanexa. <sup>14</sup> Vajatuxanenë Jesús petëpaecujinae Dioso icatsia asaëyaexanatsi. Bajaraxuata payapëtaniji baja pexaniajaicue Dioso icatsia paxanë ata pataniasaëyaexanaejavanexa patatëpaecujinae, Dioso patayajavajinavanapaenexa pijanacuatatsia. <sup>15</sup> Paxanë itsamonae panebejiobiaexanabiabi ata,

itsiata apo pacopatsinë patacatsipaebabiabijava pexaniajailivaisi. Nexata panevajënaeyabelia pajumecovënëtaponame patacatsipaebilivaisi. Nexata baja itsa paayaibitsaëtomë tsaponae Dioso panejumecovënëtsivi, paayaibitsaëtomë baja pijinia tsaponae Diosojavabelia panejumaitshivinexa: “Xanepana rabaja. Tsipaji bitso pexaniacuene panetoexaname,” panejaivinexa Diosojavabelia. Nexata papecajumetaevi ayaibitsaëto yapëtaena Dioso bitso ayaijamatabëcuene pexinaejava.

<sup>16</sup> Bajaraxuata itsamonae panebejiobiaexanabiabi ata, itsiata apo pajamatabëcopatsinë jivi patatsipaebabiabijava pexaniajailivaisi. Pataperabëto cueranaponae ata, itsiata patavajënaeyabelia, caematacabi canacujitsia, pajamatabëcuenesaënë tsaponae Dioso patajumecovënëtsijava. <sup>17</sup> Xua nacatocopiapatabiaba itsamonae vajanacabejiobiaexanabiabinexa, saya caepatoyo bajarapacuenia nacabejiobiaexanabiaba mapanacuataje vajajinavanapaeepatoyo. Bajaraxuacujinae athëbëtatsia xainaenatsi daxitacuenevecua pexaniajava, baitsi matacabi apo peverevere-caejava. <sup>18</sup> Nexata apo vajënaeevetavanapaetsi vajanacatocopiapatsinexa, xua nacacaëjëpa vajataenexa. Biji rajane jamatabënjinavanapatsi vajanacatocopiapatsinexa xua apo nacacaëjëpae vajataenexa. Tsipaji xua nacacaëjëpa vajataenexa, daxita bajaraxua, vereverecaena. Itsiata baitsi jane xua apo nacacaëjëpae vajataenexa, daxitamatacabijavabelianexa apo vereverecae tsane.

## 5

<sup>1</sup> Mapanacuata jivi pexanaebobërëto bepìjia baabeje. Bajara pijinia itsi vajaperabëto ata. Bepìjia vereverecaena. Itsiata baitsi jane yapëtanetsi mapacueneje. Vajatëpaecujinae itsamatacabi Dioso athëbëtatsia nacarajutsiana apo pevereverecaeperabëtonexa. <sup>2</sup> Xaniajai cajena. Itsa abaxë jinavanapatsi mapanacuataje, bitso picani jitsipabiabatsi vajanacaperabëithianaenexa athëbëpijiperabëtonexa. Jitsipabiabatsi picani vajaponaenexa athëbëabetsia pejanaperabëto vajayajavajinavanapaenexa athëbëtatsia. <sup>3</sup> Athëbëtatsia raja aperabëjibia apo jinavanapae tsanetsi. Biji rajane pejanaperabëto yajavajinavanapatsi. <sup>4</sup> Itsa abaxë jinavanapatsi mapanacuataje, bitso picani jitsipabiabatsi vajanacaperabëithianaenexa. Apo jitsipaetsi picani vajatëpaejava. Itsiata baitsi jane yapëtanetsi mapacueneje. Vajatëpaecujinae itsamatacabi athëbëtatsia yajavajinavanapatsi pejanaperabëto, apo pevereverecaeperabëtonexa jane baja. Nexata mapanacuata vajayajavajinavanapaeperabëtomi ajibi baja tsane. Xainaenatsi juya apo pevereverecaeperabëtonexa. <sup>5</sup> Bajarapacuenia vajanacaperabëithianaenexa Dioso nacatoxaina. Nexata Dioso nacatocopata Espíritu Santo vajanacayajavaponaponaenexa. Nexata Dioso yabara bejamatabëjumaitsitsi mapacueniaje: “Mapacueniaje Espíritu Santo Dioso pataneyajavaponaponaeyaexanaexae, nexata payapëtaniji xaniajai pepacuene itsamat-acabi Dioso pataneperabëithianaeyavanexa. Xaniajai baja cajena. Pepacuene itsamatacabi

Dioso paneperabëitothianaena pacuenia baja najumecapanepaeya jumaitsi,” bejamatabëjaitsi Dioso yabara.

<sup>6</sup> Bajaraxuata apo jamatabëcopatsitsi vajajumecovënëtsijava Dioso. Vajavajënaeyabelia jamatabëcuenebarëyatsi. Yapëtanetsi mapacueneje. Itsa abaxë vajaperabëto yajavajinavanapatsi mapanacuataje, panacuata itsamatacabi vajatuxanenë daxitamatacabijavabelianexa yajavajinavanapaejitsiatsi, bajarapanacua abaxë tajë vecuajinavanapatsi. <sup>7</sup> Apo taetsi abaxë athëbëtatsia vajatuxanenë vajayajavajinavanapaejavanexa. Itsiata yapëtanetsi itsamatacabi xaniajai vajatuxanenë athëbëtatsia vajayajavajinavanapaejavanexa. <sup>8</sup> Bajaraxuata jitsipatsi vajatëpaejava. Tsipaji mapanacuata vajajinavanapaejava, matatoxenetsia bitso jitsipatsi vajatuxanenë pijanacuatatsia vajayajavajinavanapaenexa. <sup>9</sup> Bajaraxuata mapanacuata vajajinavanapaematacabibeje, asaëyata vajatuxanenë tonacuenebavanapatsi. Tsipaji jitsipatsi vajanacasivajamatabëcuene barëyajava. Vajatëpaejinae ata, pijanacuatatsia jamatabëtojinavanapatsi pejitsipacuena. <sup>10</sup> Vajatuxanenë pejitsipacuena jamatabëtojinavanapatsi mapanacuata ata vajajinavanapaeepato. Tsipaji caejivitsi canacujitsia Cristo pitabarata tonaitajëtaponanatsi. Nexata bajarapamatacabi nacarajutsiana daxita pijajivitsi xua nacatoxaina vajanacarajutsinexa. Xaniavaetsia vajatuxanenë itsa tonacuenebavanapatsi, nacarajutsiana xua nacatoxaina vajanacarajutsinexa. Pamonaë xaniavaetsia

apo tonacuenebavanapae, nacueratsiana.

*Pacuenia Dioso nacabarajamatabëcuenexanepana vajaneconi yabara Cristo vajanacasivatëpaexae yabara pelivaisi*

<sup>11</sup> Payapëtaniji baja cajena itsamatacabi vajatuxanenë pitabarata cjunaviaya patananubenaefavanexa. Bajaraxuata asaëyata jivijavabelia patsipaebabiabajë Jesucristo pesivatëpaejavatsi pejumecovënëtsinexa. Itsajamatabëcuene apo panajamatabëxainabiabinë bajarapalivaisivecua. Dioso baja cajena panejamatabëcueneyapëtane pacuenia pajamatabëcueneitsinë. Pajitsipajë paxamë ata patanejamatabëcueneyapëtaenexamë. <sup>12</sup> Bajarapacuenia paxanë apo pacanavajunupaebitsi saya pataneyaiyataenexamë. Pacanavajunupaebatsi rajane pataneyapëtaenexamë vajatuxanenë papijajivicueneenë. Nexata bajarapacuenia paxamë papecajamatabëcuenecaëjëpaenexa panejumecanaviatsijava pamonaë pibisiacuena panebaracuaicuajai. Bajarapamonaë paneyalivaisiaexanabiaba. Beayaijamatabëcuenevi nataeyabiaba. Pexaniacuene exanabiabi ata, bajaraxua exanabiaba saya jivi petaenexatsi. Itsiata baitsi jane bitso naneconita Diosojavabelia pibisiacuene pexanaeneconi yabara. Apo canaëjëtsi pexaniajamatabëcuene pexainaenexa. <sup>13</sup> Paxanë picani xaniavaetsia Dioso jumecovënëtsiaya jivi patsipaebabiabajë Jesús pelivaisi. Itsiata Dioso apo pejumecovënëtsivi, panejumai tsabiabi: “Pematajemabivitsi raja saya,” panejai tsabiabi. Itsiata itsa

pacatsipaebabiabatsi bajarapalivaisi, Jesucristo pelivaisi, pacatsipaebabiabatsi paxamë ata Dioso papecacapanepaenexa. Paxamë apo panetaemë bepatanematajemabivi. <sup>14</sup> Cristo raja paneasiva tsabiabi. Bjaraxuata patonacuenebavanapajë. Pajamatabëjumaitsinë tsabiabi: “Caenë Cristo nacasivatëpa daxitanexatsi. Bjaraxuata Dioso baja nacatane Cristo bevajayajavatëpaevi. Nexata baja bevajananeconimatamotsicapanepeavi Dioso nacatane,” pajamatabëjanë tsabiabi. <sup>15</sup> Cristo jivi sivatëpa. Petëpaecujinae Dioso icatsia asaëyaexanatsi. Nexata daxita pamonaë jumecovënëta Cristo pesivatëpaejavatsi, matabi apo pevereveceajava xainaena. Nexata bajarapamonaë apo bexanavanapae pijacuata penatojitsipaecuena. Biji rajane bexanavanapa pacuena Cristo tojitsipatsi pesivajamatabëcuenebarëyanexatsi. <sup>16</sup> Bjaraxuata ajena mapamatacabijavaveliacujinaeje, patavajënaeyabelia tsaponae, Dioso pejumecovënëtsivi yabara apo bepanajamatabëxainaenë pibisiacuena, pacuena Dioso apo pejumecovënëtsivi banajamatabëxaina. Tsipaji pamonaë Dioso pejumecovënëtsivi pacuena bëpënëaverena jamatabëcueneitsi, apo pajamatabëcuenyapëtaenë. Xanë ata rabaja picani Jesucristojavabelia tanajamatabëcuene copatsivajënaeya, Jesucristo yabara najamatabëxainajë pibisiacuena, pacuena banajamatabëxaina Dioso apo pejumecovënëtsivi. Bepenajumetsënëtsinë taniji Cristo. Itsiata baitsi jane aeconoxae baja bajarapacuena apo najamatabëxainaenë Cristo yabara. Tsipaji baja yapëtaniji Cristo pexaniajainëcuene. <sup>17</sup> Pajivi

najamatabëcuenecopata Jesucristojavabelia,  
 bajarapajivi xaina pejanajamatabëcuene.  
 Pijaperujujamatabëcuenemi baja vecuaajibi-  
 aexanatsi. Nexata bajarapajivi daxitacuene  
 sivanajamatabëxaina pexaniajamatabëcueneta.

<sup>18</sup> Daxitatsi Dioso pejanajamatabëcuene nacara-  
 juta. Dioso nacabarajamatabëcuenexanepana  
 Cristo vajanacasivatëpaexae vajaneconi yabara.  
 Nexata Dioso panetocopata pejumelivaisi  
 patatsipaebanajetarubenaenexa daxitajivijava,  
 bajarapamonae ata itsa jumecovënëta,  
 Dioso pebarajamatabëcuenexanepanaenexatsi.

<sup>19</sup> Nexata Cristo cruzata itsa sivatëpa  
 mapanacuapijivije, Cristo pesivatëpaexaetsi, Dioso  
 barajamatabëcuenexanepanaeya tanetsi daxita  
 pamonaе jumecovënëta Cristo pesivatëpaejavatsi.  
 Paneconi picani bajarapamonae xaina,  
 Dioso baja vecuaajibiaexanatsi Cristo pesi-  
 vatëpaejamatabëcuenetatsi. Bajarapalivaisi Dioso  
 panetocopata patatsipaebanajetarubenaenexa  
 jivijavabelia.

<sup>20</sup> Nexata paxanë Cristo  
 papijajivinë tsanajetarubenaе. Cristo baja  
 cajena pejamatabëcueneta, papatajë paxamëjavata  
 patacatsipaebinexa pexanialivaisi. Pacuenia  
 Dioso itsa patsipa, pacamuxujiobijitsipa,  
 bajarapacuenia xanë ata pacamuxujiobatsi Cristo  
 papecasivatëpaexae panijaneconi yabara Dioso  
 papecabarajamatabëcuenexanepanaenexa. <sup>21</sup> Cristo  
 pibisiacuene apo exanae, tsiquirijavayo ata.  
 Itsiata baitsi jane Cristo Dioso tsijumaxuabatsi  
 daxita vaxaitsi vajaneconimi. Nexata vajaneconi  
 yabara Cristo bepibisiacuene pexanaenëcuenia  
 cruzata beyaxuabatsi. Bajarapacuenia Cristo

cruzata vajanacasivatëpaexae, nexata Dioso aneconijibia nacatane itsa jumecovënëtatsi Cristo vajanacasivatëpaejava vajaneconi yabara.

## 6

<sup>1</sup> Dioso pataneyajavanacuenebixae, asaëyata pacamuxujiobatsi. Dioso pinijicuenia papecaitaxutotsoniataejava, pacatsipaebatsi panejumeaebiyanima. Itsa pajumeaebijitsipame, nexata Dioso nacueratsipa papecaitaxutotsoniataejava. <sup>2</sup> Tsipaji Dioso jivi pitaxutotsoniataejavanexa, tajëvelia Dioso pejumelivaisibaxutota jumaitsi mapacueniaje: Pamatacabi jivi itaxutotsoniataenajë, cajumetaenatsi. Nexata pamatacabi jivi capanepaenajë, xamë ata cayavenonaenatsi, jai tajëvelia Dioso pejumelivaisibaxutota.

Aeconoxae rabaja nacatocopiapata Dioso vajanacaitaxutotsoniataejava vajanacapanepaenexa jane baja.

<sup>3</sup> Itsa patonacuenebavanapajë Dioso, pajitsipajë daxitajivi xaniavaetsia patatsitajinavanapaejava, daxitajivi Dioso pejumecovënëtsinexa. Apo paexanaenë pibisiacuene, tsiquirijavayo ata, pataexanaejava yabara jivi patanejumeaebiyanima Dioso pejumelivaisi itsa patsipaebajë. <sup>4</sup> Biji rajane daxita xua paexanavanapajë, xaniavaetsia patsitaexanavanapajë jivi pataneyapëtaenexa Dioso papijajivicuenenë. Itsamonae panebejiobiaexanabiaba. Itsajavata bitso panamatavenonabiabajë itsacuenejavaxi. Itsajavata bitso panetsiayai tsabiabi itsamonae

patanebeyejebinexa. Bajarapacuenia panetsiyai tsabiabi ata, itsiata bajayajebi pajamatabëcuenesaënë tsavanapae Dioso pejumelivaisi jivi patatsipaebavanapaejava. <sup>5</sup> Itsajavata panejumatitibabeyabiaba. Itsajavata penaneconitsivi pejebabiabibota panejebabiaba. Itsajavata Cristo pelivaisi jivi itsa patsipaebajë, itsamonae anaeya panebarajinabiaba patanebeyejebinexa picani. Itsajavata bitso panacuenebabiabajë. Itsajavata meravi ata apo pamajitabiabinë Dioso pejitsipaecuenia pataexanaenexa. Itsajavata bitso patajani tsabiabi. Bajarapacuenia panetoayapëbeje tsabiabi ata, itsiata bajayajebi pajamatabëcuenesaënë tsavanapae Dioso pejumelivaisi jivi patatsipaebavanapaejava. Nexata jivi paneyapëtane Dioso papijajivicuenenë. <sup>6</sup> Dioso papijajivicuenenë jivi pataneyapëtaenexa, jivi patsitajinavanapajënuu mapacueniaje. Pamatacabibeje pajinavanapajë, pibisiacuene apo paexanavanapaenë. Biji rajane jivi patsitajinavanapajë pexaniajailivaisi patayapëtaevicuenia. Bajayajebi itsamonae pibisiacuene paneexanabiabi ata, apo pacuene canaviatabiabinënuu. Pexaniacuene patoexanabiabajënuu itsamonaejavabelia. Patsitajinavanapajënuu pacuenia Espíritu Santo paneyapëtaeyaexanapona Espíritu Santo patanetsijamatabëecaexae. Patsitanajamatabëcuene itajëtavanapajënuu itsamonae ata pataasivajava patajamatabëëthëtojavavetsina. Bajarapacuenia patatsitajinavanapaexae, jivi xaniavaetsia paneyapëtane Dioso papijajivicuenenë. <sup>7</sup> Dioso

papijajivicuenenë jivi pataneyapëtaenexa,  
 patsitajinavanapajënuua mapacueniaje.  
 Èpexaniajailivaisi jivi patsipaebabiabajë.  
 Patsitanacueneitajëtavanapajënuua daxita xua  
 paexanavanapajë, Dioso pataneyavenon-  
 abiabijava. Dioso baja aneconijibia  
 patanetaexae, Espíritu Santo paneyavenonabiaba  
 patanayajivitaeyabiabinexa dovathi pijacuene.  
 Paneyavenonabiabanua Espíritu Santo patacuen-  
 eamoneyabinexa dovathi. Bajarapacuenia  
 patatsitajinavanapaexae, jivi paneyapëtane  
 Dioso papijajivicuenenë. <sup>8</sup> Itsamonae  
 paneyaiyataeyabiaba. Itsamonae pijinia apo  
 paneyaiyataeyabiabi. Itsamonae pexaniacuenia  
 panebaracuaicuajai tsabiabi. Itsamonae pijinia  
 pibisiacuenia panebaracuaicuajai tsabiabi.  
 Itsamonae panetaeyabiaba pexaniajailivaisi  
 patatsipaebivicuene. Itsamonae pijinia  
 panetaeyabiaba bepatanajumetsënëtsivi.  
<sup>9</sup> Itsamonae pataneyapëtaevi ata, itsiata apo  
 bepataneyapëtaevi panetaeyabiaba. Itsajavata  
 itsamonae jamatabëpanebeyejebabiaba picani.  
 Itsiata tsiteca asaëya bajarapalivaisi patsipae-  
 bavanapajë. Dioso baja cajena panetocopata  
 itsamonae ayaicuenia patanebejiobiaexan-  
 abiabinexa, itsiata apo patanebeyejebinexa.  
<sup>10</sup> Panajamatabëxainabiabi atanë bitso itsamonae  
 pibisiacuenene pexanaejava yabara, itsiata bëpënëa  
 pepacuene pajamatabëcuenebarëyanë tsavanapae  
 daxitamatacabijavabelianexa. Patabejiobivi  
 picani. Itsiata jivi ayaibitsaëttoxanetonë  
 ricovi paexanaponajë Dioso pejumelivaisi

patatsipaebijamatabëcueneta pejumecovënëtsixae. Apo paxainaenë picani mapanacuapijicuene. Itsiata baitsi jane Diosojavabelia daxitacuene paxainajë, apo pevereverecaejavanexa jane baja.

<sup>11</sup> Tajamonae, paxamë paCorinto tomarapijivimë, pacanajamatabëcuene vajunupaebatsi baja cajena roviaia. Apo pacavecuanajamatabëcuene matayatsitsi. <sup>12</sup> Asivaya pacatae atatsi, paxamë itsiata bajarapacuenia asivaya apo panetaemë. <sup>13</sup> Pacuenia pexi pexainaenë asaëya banacoximumuxioba, bajara pijinia pacuenia paxanë ata pacamuxujiobatsi. Paxamë ata panejamatabëcuenevetsina asivaya panetaema pacuenia baja paxanë asivaya pacatanetsi.

*Pacuenia piasaëtsaponaponaenë Dioso nacatane bepijatemplobotsi tsavanapae yabara pelivaisi*

<sup>14</sup> Dioso apo pacatojitsipae mapacueneye. Paxamëyajuvënëva, Dioso pejumecovënëtsiva, pëtsa pitatsi Dioso apo pejumecovënëtsinë. Paxamë ata papebijivimë, pëtsa papitame Dioso apo pejumecovënëtsiva. Bajayajebinexa ata pëtme Dioso apo pejumecovënëtsivi. Tsipaji apo pacajamatabëcuenejèpae tsipae. Dioso pejumecovënëtsivi apo jamatabëcuenejèpae Dioso apo pejumecovënëtsivi. Tsipaji Dioso jivi pejamatabëcuene itayotsijamatabëcuenetsi, mapanacuata pitaquirijamatabëcuenebeje, apo najamatabëcuenejèpaebeje. <sup>15</sup> Cristobeje dovathibeje apo najamatabëcuenejèpaebeje. Nexata pijinia pajivi Dioso pejumecovënëtsijivi, Dioso apo pejumecovënëtsijivibeje, acuenebi bajayajebi penajuanacuenebaponaponaenexabeje.

Tsipaji apo najamatabëcuenejëpaebeje. <sup>16</sup> Bajara pijinia navecuaitsibeje Dioso pijatemplobobeje, jumapecataeya pexanaenëanë penubenaetem-plobobeje. Apo najamatabëcuenejëpaebeje. Vaxaitsi baja cajena piasaëtsaponaponaenë Dioso, nacatane bepijatemplobotsi tsavanapae. Bजारapacuenia nacatane tsipaji pacuenia bajayata Dioso templobota ponaponabiaba, bajara pijinia pacuenia aeconoxae Dioso nacayajavaponapona. Bजारapajamatabëcuene yabara bajayata Dioso vaxaitsi yabara tajëvelia jumaitsi mapacueniaje:

Tsijamatabëecaenajë bajarapamonae taya-javaponaponaenexa. Bजारapamonae pijaDiosonë tsane. Bajara pijinia pamonaе tajajivi tsane,  
jai Dioso bajayata tajëvelia vaxaitsi yabara.

<sup>17</sup> Bजारaxuata Dioso apo pejumecovënëtsivi vajavecuapitsapaejavanexa, vajatuxanenë Dioso tajëvelia nacavajunupaeba. Vajanacavajunupaе-bijavata jumaitsi mapacueniaje:

Pamonae tuatujëta pajinavanapaename, pavecuapitsapaename. Bजारapamonae navecuatsatsia pajinavanapaename. Paxamë pëtsa pibisiacuepaneaxanaename bajarapamonaeta papecajamatabëcuene bijianaeyaniva. Nexata xanë pacasivabarëya tsanetsi.  
<sup>18</sup> Paneaxanë tsane. Nexata daxita paxamë pataximë tsane,  
jai bajayata vajatuxanenë Dioso tajëvelia vaxaitsi yabara, daxitacuene pevetsinë.

## 7

1 Tajamonae bitso patacaasivavi, daxita baja pacuenia Dioso pejumelivaisibaxutota tajëvelia najumecapanepaeya jumaitsi pexicueniatsi vajanacataenexa, yapëtanetsi baja. Bajaraxuata Dioso pitabarata aneconijibia jinavanapaenatsi. Vajavitota pibisiacue ne vajaexanabiabijavami, copatsianatsi baja. Vajajamatabëëthëtota pibisiajamatabëcuene vajanajamatabëxainabiabijavami ata, copatsianatsi baja. Dioso yaiyataeya jinavanapaenatsi Dioso vajanacatojitsipaecuenia.

*Pacuenia Pablo sivajamatabëcuenebarëya Corinto tomarapijivi yabara pelivaisi*

2 Panetsitanajamatabëcueneitajëre patania-sivajavamë. Caejivi ata paxamëyajuvënëjivi apo pacayajuvënëitsacueniabitsi. Apo pacayajuvënë jamatabëcuenebijianaetsinua. Apo pacayajuvënë yamaxëitojorobitsinua bajara-pacuenia panijapalata patacavecuapitsinexa.

3 Itsa pacajumaitsitsi mapacueniaje, apo pacabijataetsi. Jume baja cajena. Pacuenia baja cajena copiaya pacajumaitsitsi, daxita matacabijavabelianexa asivaya pacajamatabënajinabiabatsi.

4 Payapëtanijinua caejamatabëcuene pane-najamatabëxainaejava. Bajaraxuata bitso pacasivajamatabëcuenebarëyatsi. Paepatota ata itsamonae panebejiobiaexanabiaba, apo panasivabëjanë tsabiabi. Tsipaji bajarapaepatota itsa pacavënëlivaisitaeyabiabatsi xaniavaetsia panejinavanapaejava, pacasivanajamatabëcuene

saëtabiabatsi. Nexata panebejiobiaexanabiabi ata, bitso pabarëyanë tsabiabi paxamë yabara.

<sup>5</sup> Macedonia nacuata patapatsicujinae, caeto ata cajena xaniavaetsia apo panacueraevetsinë. Daxitajava, itsaxuayo panajetarubenajë, paneyalivaisiaexanabiaba. Nexata itsa panayajumetaeyabiabajë itsacuenelivaisi, patajamatabëëthëtota bëpënëa payajunavi-ajinavanapabiabajë. <sup>6</sup> Itsiata baitsi jane Dioso, jivi pejamatabëcueneasaëyaexanaenëxae, panejamatabëcueneasaëyaexana. Bajarapacuenia Dioso panejamatabëcueneasaëyaexana paxamëjavaverena peponaenë, Tito, itsa patajopa paxanëjavata. <sup>7</sup> Tito pepatsixae paxamëjavaverena, panejamatabëcueneasaëyaexana. Itsiata Tito ëpepatsijava, apo panejamatabëcueneasaëyaexanae. Biji rajane Tito paxamëjavabelia itsa patajopa, paxamë pina Tito pajamatabëcueneasaëyaexaname. Bajarapacuenia paneexanaejava, Tito itsa pacavajunupaeba paxanëjavaberena, pamuxunanajamatabëcuenesaëtajë. Bitso pina picani jamatabëpanetaneme. Bajarapalivaisinua Tito panetsipaeba. Panetsipaebanua bitso paneyanajamatabëxainaejava pibisiacuene paneexanaeneconi. Panetsipaebanua bitso patanesivanajamatabëxainaejavamë itsa panevënëlivaisitaneme bitso patacasivanajamatabëxainaejava. Bajarapacuenia paneexanaejava, Tito itsa pacavajunupaeba paxanëjavaberena, bitso pamuxunanajamatabëcuenebarëyanë.

<sup>8</sup> Pabaxutomi copiaya pacatoyaquinatsi, itsa palebame, bitso pacanajamatabëxainaeyaxana. Itsiata saya caepatoyonexa. Bajarapacue-

nia papecanajamatabëxainaeayaexanaexae, bajarapabaxutomi yabara jamatabëjumaitsinë mapacueniaje: “Apo betoyaquinaenë picani bajarapabaxutomi,” jamatabëjanë. Itsiata baitsi jane aeconoxae baja bajarapabaxutomi yabara bajarapacuenia apo sivanajamatabëxainaenë. <sup>9</sup> Aeconoxae baja sivabarëyanë pataca-toitorobixae bajarapabaxutomi. Itsiata apo sivabarëyanë xua pacanajamatabëxainaeayaexanatsi panijaneconi yabara. Biji rajane sivabarëyanë tsipaji patacanajamatabëxainaeaya exanaejavata bajarapabaxutomita, pacopabame baja pibisiacuene paneexanabiabijava. Panajamatabëcuenepënëyorotame baja Diosojavabelia. Nexata pacuenia Dioso pacatojitsipa, paexanavanapame. Itsiata apo pacaitsacueniabi patacatoyaquinaebaxutomi. Biji rajane bajarapabaxutomi pejamatabëcueneta, pacajamatabëcueneyavenonatsi. <sup>10</sup> Nexata pacuenia Dioso pacatojitsipa, bitso payanajamatabëxainame panijaneconi. Nexata baja pacopabame pibisiacuene paneexanaejavami. Panajamatabëcuenepënëyorotame baja Diosojavabelia. Nexata paxamë Dioso pacacapanepaena. Pamonaë Dioso capanepaenatsi, apo jumaitsi tsane: “Apo jitsipaenë picani Dioso tanecapanepaejava,” apo jai tsane. Itsiata baitsi jane pamonaë yanajamatabëxainavanapae ata pibisiacuene pexanaeconi, itsiata itsa apo copabi tsane pibisiacuene pexanabiabijava, itsa apo najamatabëcuenepënëyorotsi Diosojavabelia, bajarapamonaë Dioso vecua naxuabiana daxitamatacabijavabelianexa.

11 Panajamatabëcuene canaëjère mapacueneye. Pacuenia Dioso pacatojitsipa, bitso paxamë payanajamatabëxainame panijaneconi. Nexata baja aeconoxae paneconijibimë Dioso pitabarata. Najamatabëcuene re viabiaya baja pacanaëjètame panijaneconi. Pepacuenene panava-junupaebamenua Dioso javabelia pacuenia paexanavanapame. Paxamë picani bitso pabaraanaepanabiabame paxamëyajuvënënë, ponë pibisiacuene exanaponapona paxamë tuatuajëta. Panecujunavabiabamenua picani bajaraponë pijaneconi yabara. Itsiata bitso pajitsipame paneexanaenexa Dioso papecatojitsipaecuena. Pasivana-jamatabëcuene veretamenua panenaneconitsiaexanaenexa paxamëyajuvënënë, ponë pibisiacuene exanaponapona paxamë tuatuajëta. Bajarapacuenia itsa pasivanajamatabëxainame pibisiacuene pexanaponaponaenë, Dioso patsitanajamatabëcuene itajètame Dioso javabelia apo panenaneconitsijava. <sup>12</sup> Itsa pacatoyaquinatsi copiaya pabaxutomi, pacatoyaquinatsi padaxitamë patacamuxujiobinexa. Apo toyaquinaenë caenë paxamëyajuvënënë tamuxujiobinexa, ponë pibisiacuene exanaponapona paxamë tuatuajëta. Apo toyaquinaenë nua tamuxujiobinexa ëponë ata pibisiacuene toexanatsi itsanë. Pacatoyaquinatsi bajarapabaxutomi padaxitamë patacamuxujiobinexa. Pacatoyaquinatsi bajarapabaxutomi tsipaji pajitsipajë panijacuata panenajamatabëcuene yapëtaenexa juya pataniasivajavamë. Baitsi pacuenia pajitsipame, Dioso pitabarata patanejumecovënëtsinexamë

patacasivajamatabëcuenebarëyanexa. <sup>13</sup> Nexata baja panejumecovënètame. Bajarapacuenia patanejumecovënëtsixaemë, bitso pacasivajamatabëcuenebarëyatsi.

Pibisiacuene itsa paexaname, Tito bitso pacasivanajamatabëxaina. Itsiata baja aeconoxae daxita paxamë Dioso pitabarata xaniavaetsia panejinavanapaexae, apo pacasivanajamatabëxainae baja. Bjaraxuata pacasivajamatabëcuenebarëya Tito. Nexata Tito papecasivajamatabëcuenebarëyajava yabara, paxanë ata bitso pacasivajamatabëcuenebarëyatsi.

<sup>14</sup> Tito peponaevajënaeya paxamëjavabelia, jumaitsinë bajaraponëjavabelia: “Corinto tomarapijivi, Dioso pejumecovënëtsivi, tatoyaquinaebaxuto pejamatabëcueneta, itsiata najamatabëcuenexanebianana Diosojavabelia,” janë paxamë yabara Titojavabelia. Nexata bajarapacuenia paexaname baja. Bitso nexata Tito pacasivajamatabëcuenebarëya. Pacuenia xanë pacatsipaebabiabatsi pexaniajailivaisi, bajarapacuenia paxamë yabara tsipaebajë Titojavabelia. Bajarapacuenia itsa tsipaebajë, xaniajanë cajena. Tsipaji pacuenia pacatoy-aquinatsi, paexanavanapame. Bjaraxuata pacasivajamatabëcuenebarëyatsi.

<sup>15</sup> Tito najamatabënapitabiaba panejumecovënëtabiabijava pacuenia pacaitoroba. Najamatabënapitabiabanua yaiyataeya panecopiapitsijava ata. Bjaraxuata Tito bitso pacaitaxanapona pevajënaeyabelia. <sup>16</sup> Pacasivajamatabëcuenebarëyatsi. Tsipaji xaniavaetsia yapëtaniji paneexanavanapaejava pacuenia Dioso pacatojitsipa.

## 8

*Pacuenia Dioso pejumecovënëtsivi penajamatabëcuenerajutsixae Diosojavabelia, ofrenda tojeba Diosonexa yabara pelivaisi*

<sup>1</sup> Tajamonae, pacatoyaquinatsi mapalivaisije paneyapëtaenexa pacuenia Dioso jamatabëcueneyavenonatsi Dioso pejumecovënëtsivi, Macedonia nacuapijivi. <sup>2</sup> Macedonia nacuapijivi petoayapëbejecuenetsi tocopiapataponae atatsi ayaicuenia pejamatabëcueneëjëtsinexatsi, itsiata jamatabëcuenebarëya tsavanapae. Bajarapamonae bitso bepejiobivi picani. Itsiata ofrenda itsa exana petoitorobinexa bepejiobivi Jerusalén tomarapijivijavabelia, ayaijava jebabiaba. <sup>3</sup> Xanë yapëtaniji bajarapamonae bepejiobivicuene. Itsiata bepejiobivi ata, ayaijava jebabiaba ofrenda itsa exanabiaba. Bajarapamonae jebabiaba bajarapacuenia, itsajivi ata apo itorobi atatsi ayaijava pejebinexa. <sup>4</sup> Bajarapamonae pinijicuenia paneitoroba patatocaponaenexa pejebiofrenda. Panejumaitsi mapacueniaje: “Pexaniacuenepanetoexanaename. Panetocaponaename mapaofreundaje Jerusalén tomarajavabelia Dioso pejumecovënëtsivi panerajutsinexa. Paxanë ata bitso jamatabëpayavenonajë bajarapamonae,” panejai. <sup>5</sup> Nexata bajarapamonae bepejiobivixae, pasivajamatabëjumaitsinë picani: “Tsiquirijavaxi meta bajarapamonae jebiana,” pasivajamatabëjanë picani. Itsiata bajarapamonae ayaijava jeba. Bajarapamonae ëofrenda apo rajutsi Diosojavabelia. Biji rajane

copiaya najamatabëcuenerajuta Diosojavabelia pacuenia Dioso itorobaponatsi pexanabiabinexa daxitamatacabijavabelianexa. Bajaraxuacujinae pejebiofrenda paxanëjavaberena panerajuta patatocaponaenexa bepejiobivijavabelia. Bajarapacuenia itsa exana, exana Dioso petojitsipaecueniatsi. <sup>6</sup> Paxamë, paCorinto tomarapijivimë, paofrenda paxamë ata pacatuatame panerajutsinexa Dioso pejumecovënëtsivi, Jerusalén tomarapijivi, Tito pacajamatabëcueneyavenona panecaetuatsijava. Itsiata abaxë apo paveretsimë panecaetuatsijava. Bajaraxuata aeconoxae baja icatsia Tito paitorobajë paxamëjavabelia paneveretsinexa jane baja bajarapaofrenda panecaetuatsijava. <sup>7</sup> Paxamë itsamonaevécua xaniavaetsia Dioso patojinavanapame. Xaniavaetsia panajamatabëcueneocopatame Diosojavabelia. Payapëtanemenua xaniavaetsia Dioso pejumelivaisi. Pacacaëjëpanua xaniavaetsia Dioso pejumelivaisi panetsipaebinexa itsamonae. Bitso pacajamatabëcueneenabiabanua Dioso pijacuene panetonacuenebavanapaenexa. Bitso paneasivamënuu. Nexata paneyavenonaenexa bepejiobivi, Jerusalén tomarapijivi, ayaijava bepajebame ofrenda itsa paexaname.

<sup>8</sup> “Macedonia nacuapijivi, bepejiobivi ata, ayaijava ofrenda jeba,” itsa janë, apo pacaitorobitsi paxamë ata ayaijava ofrenda panerajutsinexa. Biji rajane saya pacatsipaebatsi paneyapëtaenexa pacuenia Macedonia nacuapijivi bitso jamatabëcuenebarëyaya toexana ofrenda bepejiobivi peyavenonaenexa.

Bajarapacuenia paxamë ata itsa paexanaename, itsamonae patsitanajamatabëcuene itajëtsianame panexaniajaicuene Dioso paneasivajava. <sup>9</sup> Bajarapacuenia paxamë ata ofrenda parajutsianame. Tsipaji payapëtaneme pacuenia vajatuxanenë Jesucristo nacayavenona vajanacaasivaxae. Bajaraponë picani ayaijamatabëcuenenë. Daxitacuene pevetsinë. Itsiata papecaasivaxae, nabejibiaexana papecayavenonaenexa. Bajarapacuenia papecasivanabejibiaexanaexae, nexata paxamë ata itsamatacabi paayaijamatabëcuenevimë tsane Dioso pijanacuatatsia.

<sup>10</sup> Pacatsipaebatsi paneyapëtaenexa pacuenia panetsitaxanepana paxamë paneexanaenexa bajarapaofrenda. Paxamë picani imata pavaimi bitso jamatabëpayavenoname Dioso pejumecovënëtsivi, Jerusalén tomarapijivi. Nexata paxamë daxitajivivajënaeya jamatabëpatoexaname ofrenda. <sup>11</sup> Paxamë picani imata pavaimi Jerusalén tomarapijivi bitso jamatabëpayavenoname ofrendanexa. Bajarapacuenia aeconoxae ata tsiteca paexanare paneveretsinexa jane baja palata panecaetuatsijava bajarapaofrendanexa. Parajutsianame pacuenia pacacaëjëpa. <sup>12</sup> Nexata itsa pepacuene parajutsianame pacuenia pacacaëjëpa, Dioso pacasivajamatabëcuenebarëya tsane. Tsipaji apo pacaitorobi xua apo paxainaemë panerajutsinexa.

<sup>13</sup> Apo pacaitorobitsi raja mapacueniaje: “Itsamonae paneyavenonaenexa, ofrenda itsa paexaname, pabuare daxita panex-

ainaepalatayomi,” apo pacajaitsi. Tsipaji juya paxamë panamatavenonaejitsipame. <sup>14</sup>Jitsipatsi namataenetsia vajanayavenonaenexa vajanamatavenonaejavaxi yabara. Aeconoxae baja pacacaëjëpa paneyavenonaenexa bepejiobivi, Jerusalén tomarapijivi. It-samatacabijavabelia, pamatacabi paxamë panamatavenonaename, caëjëpaenatsi juya bajarapamonae papecayavenonaenexa. Bajarapacuenia nexata daxita paxamë panamatavenonaejavaxi, apo panamatavenonaemë tsane. <sup>15</sup> Bajarapajamatabëcuenelivaisi yabara Dioso pejumelivaisibaxutota jumaitsi mapacueniaje: “Itsajivi bitso ayaijava xainae ata, itsiata apo toyajuvënënacopatsitsi. Itsajivi pijinia tsiquirijavayo xainae ata, itsiata apo namatavenonae,” jai Dioso pejumelivaisibaxutota. Bajaraxuata paxamë ata panexainaeyajuvënëjava, beparajutame penamatavenonaevijavabelia.

*Pacuenia Tito, anijanëbeje yajava, pona Corinto tomarabelia yabara pelivaisi*

<sup>16</sup> Xanë bitso jitsipajë paxamë patacayavenonaenexa. Tito ata bajarapacuenia jitsipa papecayavenonaenexa. Bajaraxuata pexaniajamatabëcuene rajutajë Diosojavabelia. Tsipaji Espíritu Santo pejamatabëcueneta Titobeje panajamatabëcuenejëpajëbeje paxamë yabara. <sup>17</sup> Nexata Tito itorobajë papecataenexalia, papecayavenonaenexanua bajarapaofrenda panecaetsijava paneveretsinexa baja tavajënaelia. Barëyaya Tito jejai peponaenexa

paxamëjavabelia. Bajaraponë ata pijacuata pejitsipaexae peponaejava paxamëjavabelia, ponaena papecayavenonaenexa.

18 Tito pepëta paitorobajë itsanë Dioso pejumecovënëtsinë. Bajaraponë Macedonia nacuata daxita Dioso pejumecovënëtsivi bitso peyapëtaenëtsi. Peyaiyataenëtsinua. Tsipaji xaniavaetsia tsipaebabiaba Dioso pejumelivaisi jivi pecapanepaelivaisinexatsi. 19 Ponë, Tito yajava, ponaejitsia paxamëjavabelia, bajaraponë Macedonia nacuata itapetatsi daxita Dioso pejumecovënëtsivi. Nexata pamatacabi paponaeñajë Jerusalén tomarajavabelia, bajaraponë payajavaponaenajë. Nexata paofrenda pacaponaejitsianë, bajaraponë paneyavenonaeyacaponaena. Bajarapaofrenda pacaponaenajë Jerusalén tomarapijivi pesivajamatabëcuenebarëyanexa Dioso. Patsitanajamatabëcuene itajëtsianajënuua patajitsipaejava patayavenonaenexa pamonae bepejiobivi. Nexata bajarapamonae jamatabëjumai tsane: “Matsaena pamonae jitsipa peyavenonaenexa bepejiobivije,” jamatabëjai tsane. 20 Bajarapacuenia Macedonia nacuapijinë payajavaponaenajë itsajivi ata patanebaracuaicuaijayaniva bajarapapalataxaneto yabara. “Pablobana raeta bajarapapalata yajuvënëcopata,” patanejayaniva. 21 Dioso baja cajena paneyapëtane apo patanacobetoxotsivicuene. Itsiata pajitsipajë daxitajivi ata pataneyapëtaenexa apo patanacobetoxotsivicuene.

22 Titobeje icatsia itsanë patsicueyaitorobajë

Dioso pejumecovënëtsinë peyajavaponaenexabeje paxamëjavabelia. Bajaraponë anijatonë pajamatabëcuenejëtabiabajë. Xaniavaetsia bitso paneyavenonabiaba. Nexata aeconoxae paxamë bitso jamatabëpacayavenona. Tsipaji pacavënëlivaisitane paneyavenonaejavanexa Jerusalén tomarapijivi. <sup>23</sup> Nexata Tito yabara itsajivi itsa pacayanijobiana: “¿Detsa pacuenia maponë peponaponaenëje?” itsa pacajai tsane, pajumaitsimë tsane: “Pablobeje raja penajuaponaenëbeje. Bajaraponë Tito Pablo yavenonabiaba vaxaitsi juya Pablo vajanacayavenonaenexa,” pajamë tsane. Itsajivi itsa pacayanijobiana Tito peyajavaponaenëbeje yabara, pajumaitsimë tsane: “Bajaraponëbeje Dioso pejumecovënëtsivi pitorobinëtsibeje. Bajaraponëbeje xaniavaetsia Cristo petoponaenëjavabeje jivi petaexae, nexata jivi yaiyatane Cristo pelivaisi,” pajamë tsane. <sup>24</sup> Nexata bajaraponëbeje itsa patsianabeje paxamëjavata, patsitanajamatabëcuene itajëtsianame paneasivajava bajaraponëbeje. Nexata Dioso pejumecovënëtsivi, pamonaenë itorobatsibeje bajaraponëbeje, pacavënëlivaisitaena paneasivajava bajaraponëbeje. Nexata asivaya itsa pacopiapitsianame Dioso pejumecovënëtsivi pitorobinëtsibeje, nexata Dioso pejumecovënëtsivi jamatabëjumai tsane paxamë yabara: “Pacuenia baja Pabloana nacatsipaeba, xaniajai baja cajena. Corinto tomarapijivi asivaya tane daxitajivi,” jamatabëjai tsane.

## 9

*Ofrenda pecaetuatsijava Dioso pejumecovënëtsivijavabelia peyavenonaenexa yabara pelivaisi*

<sup>1</sup> Ofrenda pacaetuataponame paneyavenonaenexa bepejiobivi, Dioso pejumecovënëtsivi, Jerusalén tomarapijivi. Apo jitsipaenë picanicatsia patacatoyaquinaenexa bajaraxua yabara. <sup>2</sup> Tsipaji baja yapëtaniji pacuenia bitso jamatabëpayavenoname bajarapamonae. Bajaraxuata pacasivajamatabëcuenebarëyatsi. Nexata paxamë yabara jumaitsinë Macedonia nacuapijivijavabelia: “Acaya nacuapijivi, Corinto tomarata penacaetuatabiabivi, imata baja cajena pavaimi najamatabëcuenevereta perajutsinexa ofrenda Jerusalén tomarapijivijavabelia,” janë paxamë yabara. Nexata Macedonia nacuapijivi itsa pacavënëlivaisitane paneyavenonaejavanexa Jerusalén tomarapijivi, Macedonia nacuapijivi ata ayaibitsaëtoxaneto tocaetuatapona ofrenda peyavenonaenexa Jerusalén tomarapijivi. <sup>3</sup> Nexata pacatoitorobatsi Titobana papecayavenonaenexa paneveretsinexa baja bajarapaofrenda panecaetuatsijava panerajutsinexa Jerusalén tomarapijivi. Tavajënaelia itsa apo paveretsimë tsipae ofrenda panecaetuatsijava, paxamë yabara pexaniacuenia tajumaitisijava, najumecovëauranë tsipae Macedonia nacuapijivijavabelia. <sup>4</sup> Tsipaji itsamonae Macedonia nacuapijivi belia naponaejitsipa tapëta paxamëjavabelia. Itsa bajarapamonae taejitsipa bajarapaofrenda

apo paneveretsijava, nexata bitso paxamë yabara auranë tsipae. Tsipaji paxamë yabara bajaya baja jumaitsinë: “Corinto tomarapijivi jamatabëveretapona baja ofrenda pecaetuatsijava,” janë paxamë yabara. Nexata paxamë ata bitso pauramë tsipae. <sup>5</sup> Bajaraxuata jamatabëjumaitsinë: “Titobana Corinto tomara-belìa tavajënaeyabelìa itorobianajë,” jamatabëjanë. Nexata Titobana pacajamatabëcueneavenonaena ofrenda panecaetuatsijava, paneveretsinexa baja pacuenia najumecapanepaeya panetocaëjëtame. Nexata baja tavajënaelia bajarapaofrenda itsa paxaniavaetabuatsianame, panajamatabëcueneitajëtsianame Jerusalén tomarapijivi paneasivaxae paneyavenonaejava, apo ëpatacaitorobixae.

<sup>6</sup> Pacanaëjëre mapalivaisije. Tsiquirijavayo peubinë, tsiquirijavayo pijinia batopitsapatsi. Ayaijava pijinia peubinë, ayaijava batopitsapatsi. Nexata ayaijava itsa parajutsianame itsamonaëjavabelìa, Dioso juya pacarajutsiana ayaijava. <sup>7</sup> Nexata caejivi canacujitsia berajuta pacuenia najamatabëcuenevereta perajutsinexa. Pëtsa pajamatabëjumaitsimë: “Apo jamatabërajutsi atanë picani, itsiata taneitorobixae, rajutsianajë,” pajamatabëjamë pëtsa. Tsipaji pajivi rajuta itsajivijavabelìa jamatabëcuenebarëyaya, Dioso asivatsi. <sup>8</sup> Dioso baja cajena caëjëpatsi papecarajutaponaenexa pacuenia panamatavenoname matatox-enetsia. Nexata xua panamatavenoname, paxainaponaename. Pacatonacopatsiananua panerajutsinexa bepejiobivijavabelìa. <sup>9</sup> Dioso

pejumelivaisibaxutota jumaitsi mapacueniaje:  
 Ponë rajutabiaba bepejiobivi penamatavenon-  
 aecuene, bajaraponë pexaniacuene exan-  
 abiaba Dioso pitabarata. Nexata bajara-  
 pacuene Dioso apo nacofënëtsi daxitamata-  
 cabijavabelianexa,  
 jai Dioso pejumelivaisibaxutota.

<sup>10</sup> Dioso rajuta jivi peubixunexa. Bajarax-  
 uacujinae icatsia Dioso pejamatabëcueneta  
 penaveretsixu capitsapa penotsinexa jivi  
 pexaejavanexa. Bajara pijinia pacuenia  
 Dioso pacarajutsiana panexainaejavanexa,  
 panerajutsinexanua bajaraxuayajuvënëjava  
 bepejiobivijavabelia. Pacacaëjêpaeyaexanaenanua  
 êpexaniacuene ayaijava paneexanaenexa.

<sup>11</sup> Bajarapacuenia Dioso pacarajutsiana  
 panexainaenexa ayaijava. Nexata pacacaëjêpaena  
 bajaraxuayajuvënëjava juya panerajutsinexa  
 bepejiobivijavabelia. Nexata paofrenda  
 panerajutame patatocaponaenexa Dioso pejume-  
 covënëtsivi, Jerusalén tomarapijivi, itsa parajut-  
 sianajë bajarapamonae, pexaniajamatabëcuene  
 rajutsiana Diosojavabelia bajarapacuenia  
 paneyavenonaexae. <sup>12</sup> Bajarapacuenia Dioso  
 pejumecovënëtsivi, bepejiobivi, itsa parajutame,  
 payavenoname bitso penamatavenonaejavata.  
 Bajarapamonae paneyavenonaejava itsa  
 taena, pexaniajamatabëcuene Diosojavabelia  
 perajutabiabijava pematatsënëa bitso  
 pexaniajamatabëcuene rajutsiana Diosojavabelia.  
<sup>13</sup> Bajarapacuenia Jerusalén tomarapijivi ofrenda  
 itsa parajutsianame paneyavenonaenexa,  
 bajarapamonae patsitanajamatabëcuene

itajëtsianame pepacuene xaniajai panejume-  
covënëtsijava pexanialivaisi, Cristo pelivaisi.  
Nexata bajarapamonae pexaniajamatabëcuene  
rajutsiana Diosojavabelia Cristo pelivaisi  
panejumecovënëtavanapaejava yabara. Ofrenda  
ata panerajutsijava Jerusalén tomarapijivi,  
paofrenda ata parajutame itsamonaejavabelia,  
bajaraxua ata yabara Jerusalén tomarapijivi  
pexaniajamatabëcuene rajutsiana Diosojavabelia.  
<sup>14</sup> Nexata bajarapamonae bitso asivaya  
pacajamatabënajinaeya pacatovajëtabiabiana  
Diosojavabelia. Tsipaji paxamë bajarapamonae  
payavenoname Dioso pejamatabëcueneta pa-  
pecaitorobixae. <sup>15</sup> Vaxaitsi pexaniajamatabëcuene  
rajutabiabatsi Diosojavabelia. Tsipaji  
Dioso pexënato athëbëvetsica nacatoitorobica  
vajanacasivatëpaenexa mapanacuataje. ¡Cristo  
vajanacasivatëpaejava pexaniacuene bitso!

## 10

*Pacuenia Pablo navajunupaeba Cristo pitorobi-  
javatsi Dioso pejumelivaisi daxitanacuanëjava jivi  
petsipaebanajetarucaenexa yabara pelivaisi*

<sup>1</sup> Pacuenia Cristo pexaniacuena pacaitorobi-  
jitsipa, bajarapacuenia xanë ata pexaniacuena  
ajumesaëya pacaitorobatsi. Itsiata baitsi jane  
itsamonae paxamëyajuvënëvi xanë yabara  
jamatabëcuenenavëxaniabiaya jumai tsabiabi:  
“Itsa abaxë Pablo tajë nacavecuaponapona,  
ajumelivaisisaëya ncatoyaquinabiabarena.  
Itsiata baitsi jane majotaje, vaxaitsijavata, itsa  
patajopaena, piaitejepaebinëcuenia patajopaena.

Ajumejibia ponaponaena piajumeuraxae,” jai tsabiabi paxamëyajuvënëvi xanë yabara jamatabëcuenenavëxaniabiaya. Itsiata bajarapacuenia apo itsinë tsane. <sup>2</sup> Nexata pexaniacuene pacavajëtatsi. Pëtsa itsajamatabëcuene panetoexaname, itsa patsialiajë paxamëjavabelia, ayaijumeta pacabijataeya patacamuxujio-biyaniva. Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabinua: “Pablo apo ponapona Dioso pejumecovënëtsinëcuenia. Saya ponapona Dioso apo pejumecovënëtsinëcuenia. Yajavaponapona pijaperujujamatabëcuene,” jai tsabiabi paxamëyajuvënëvi xanë yabara. Bajarapacuenia xanë yabara pecuaicuaijait sabiabi vijavabelia ayaijumeta bijataeya cuaicuaijanë tsane. <sup>3-4</sup> Mapanacuapijivi, Dioso apo pejumecovënëtsivi, saicayacuenia nayajiviyapëtane pijavajabit-saëvecua penaevetsinexa pitsacueniabiyani vatsi. Vaxaitsi ata mapanacuata vajajinavanapaevi, Dioso vajajumecovënëtsivi, saicayacuenia pijinia nayajiviyapëtanetsi vajanaevetsinexa dovathivecua. Dovathivecua apo naevetsitsi mapanacuapijicueneta. Pajamatabëcuenesaë Dioso nacarajuta, bajarapajamatabëcuenesaëta jamatabëcueneamoneyabaponatsi dovathi. <sup>5</sup> Nexata Dioso pejamatabëcuenesaëta, paajibiaexanaponajë jivi Dioso yabara penajumetsënëtsilivaisimi. Bajarapamonae dovathi pejamatabëcueneta itorobatsi penajumetsënëtsilivaisi petsipaebabiabinexa itsamonaejavabelia. Nexata pamona Dioso yabara penajumetsënëtsivi, pajumecovënëtsiaexanaponajë

Cristo pelivaisi Dioso pejamatabëcuenesaëta. Itsamonae pijinia dovathi pejamatabëcueneta beayaijamatabëcuenevi natane. Pamonaë bajarapacuenia najamatabëxaina, apo yapëtae Dioso. Bajaraxuata bajarapajamatabëcuenemi paajibiaexanaponajë baja. Nexata pamonaë ata bajarapacuenia beayaijamatabëcuenevi natane, pajumecovënëtsiaexanaponajë Cristo pelivaisi Dioso pejamatabëcuenesaëta. <sup>6</sup> Bajarapacuenia paxamëjava ata paexanaponaenajë. Paxanë panajamatabëcueneveretajë pataexanaenexa mapacueniaje. Paxamë baja xaniavaetsia Dioso itsa pajumecovënëtavanapaename, paxanë pacavecuacapitsapaenatsi pamonaë apo jitsipae patanejumecovënëtsinexa Cristo pelivaisi.

<sup>7</sup> Paxamë raja saya jema pataneme daxitajivi. Nexata daxitajivi pataneme pacuenia Dioso apo pejumecovënëtsivi tane daxitajivi. Nexata apo payapëtaemë pacuenia paxanë pajamatabëcueneitsinë. Pajivi nayapëtane Cristo pijajivitonëcuene, bajarapajivi bepaneyapëtane paxanë ata Cristo papijajivicuenenë. <sup>8</sup> Paxamë meta xanë yabara pajamatabëjumaitsimë tsabiabi: “Pablo saya bitso navajunupaebabiaba Dioso pitapetsijavatsi apóstolenënexa,” pajamatabëjamë meta tsabiabi xanë yabara. Dioso baja cajena paneitoroba patacajamatabëcuene asaëyaexanaenexa. Apo paneitorobi patacajamatabëcuene faefaenaeyaexanaenexa. Bajaraxuata apo ajumeuranë tsabiabi tanavajunupaebabiabijava apóstolenëjavanë. <sup>9</sup> “Pablo saya nacajamatabëcuenenabenajacaeya exanabiaba vajanacatoyaquinaelivaisianëta,” panejaijava

xanë yabara apo jitsipaenë. Tshipaji bajaraxua yabara apo pacatoyaquinaetsi. <sup>10</sup> Itsamonae xanë yabara jumai tsabiabi: “Pablo ajumelivaisisaëya nacatoyaquinabiabarena. Itsiata bajaraponë itsa patajopa majotaje, vaxaitsijavata, apo ajumesaë tsabiabi. Saya ajumelivaisixaebi tsabiabi,” jai tsabiabi itsamonae xanë yabara. <sup>11</sup> Itsiata baitsi jane pamonaë bajarapacuenia jumai tsabiabi xanë yabara, beyapëtane pacuenia bajarapamonaëjavabelia exanaejitsianë itsa papatsialiajë paxamëjavabelia. Pacuenia baja pacatoyaquinaliatsi taexanaenexa paxamëjavabelia, bajarapacuenia exanaenajë paxamëjavabelia.

<sup>12</sup> Palivaisi paxanë pacatsipaebabiabatsi, bajarapalivaisivecua saicayalivaisi itsamonae pacatsipaebabiaba. Bajarapamonaë apo canaëjëtsi pacuenia Dioso pejumelivaisibaxutota jumaitsi. Nexata bajarapamonaë namataenetsia natane bepexaniajamatabëcuenevi. Nexata pamonaë apo bajarapamonaëyajuvënëvi, bepibisiajamatabëcuenevi tane. Saya xua bajarapamonaë tsitaxanepanatsi, bajaraxua yabara jumai tsabiabi: “Maxuaje pexaniacuene,” jai tsabiabi. Xua pijinia apo tsitaxanepanaetsi, bajaraxua yabara jumai tsabiabi: “Maxuaje pibisiacuene,” jai tsabiabi. Bajarapamonaë cajena bitso apo yapëtae. Paxanë raja bajarapacuenia apo pajamatabëcueneitsinë. <sup>13</sup> Paxanë Dioso paneitoroba Dioso pijacuene patatonacuenebinexa. Nexata panacuanëjava Dioso paneitoroba, bajarapanacuanëjava Dioso pejumelivaisi patsipaebanajetarubenajë.

Dioso paneitoroba tajë ata paxamë paCorinto tomarapijivimëjavabelia ata pataponaenexa patacatsipaebinexa pejumelivaisi. Nexata itsa panavajunupaebabiabajë Dioso patanitorobijava, xuayovajëto Dioso panetocopata patatonacuenebinexa, panavajunupaebabiabajë. Ayailivaisi apo panavajunupaebabinë saya itsamonae pataneyaiyataenexa patanavajunupaebijava yabara. <sup>14</sup> Bajaraxuata itsa papatajë paxamëjavata, pacatsipaebatsi pexanialivaisi, Cristo pelivaisi. Tsipaji bajara-panacuanëjava Dioso paneitoroba pejumelivaisi patacatsipaebinexa. Bajarapalivaisi copiaya baja paxanë pacatsipaebatsi. <sup>15</sup> Itsamonae baja Cristo pelivaisi jumecovënëta itsamonae petsipaebixaetsi. Nexata Cristo pelivaisi pejumecovënëtsivi yabara najumetsënëtsiaya apo pajumaitsinë tsipae mapacueniaje: “Paxanë raja patatsipaebixae, bajarapamonae jumecovënëta Cristo pelivaisi,” apo pajanë tsipae. Pacatojitsipatsi panevajënaeyabelia panejumecovënëtavanapaenexa Dioso. Nexata pajitsipajë orijibia patacatsipaebavanapaenexa pexanialivaisi, Cristo pelivaisi. Itsiata baitsi jane ëpanacuanëjava Dioso paneitoroba patatsipaebavanapaenexa pejumelivaisi, bajaraëpanacuanëjava patsipaebavanapaenajë. <sup>16</sup> Nexata paxamë majotaje patacatsipaebicujinae, panepënëyabelia penaetomaranëjava ata jamatabëpatsipaebajë pexanialivaisi, Cristo pelivaisi. Apo pajitsipaenë patatsipaebinexa bajarapalivaisi itsaxuayo baja patavajënaeya itsamonae tsipaebapona bajarapalivaisi.

17 Pajivi itsamonaejavabelia navajunupaeba pexanaejava, benavajunupaeba Dioso peyavenonaevatsi. Bjarapacuenia benavajunupaeba pejumetaevitsi peyaiyataenexa Dioso. Bjarapajivi apo benavajunupaebi pijacuata pexanaejava jivi saya peyaiyataenexatsi. 18 Pajivi pijacuata navajunupaebabiaba: “Xanë ra bitso pexaniacuene exanabiabajë,” jai tsabiabi, bjarapajivi ajumematamobi. Tsipaji saya pijacuata navajunupaebabiaba. Itsiata baitsi jane pajivi yabara vajatuxanenë jumaitsi: “Mara pajivije xaniavaetsia netoponapona,” jai, nexata tojumenamatamotatsi.

## 11

*Pablo pelivaisi, penajumetsënëtsilivaisi petsipae-baponaevi ata, yabara pelivaisi*

1 Natsiquejemalivaisi pecuaicuaijainë, xua exana, pijacuata banavajunupaeba itsamonaejavabelia. Bajara pijinia pacuenia xanë ata, xua exanajë, tajacuata pacanavajunupaebijitsiatsi. Bjarapacuenia tajacuata pacanavajunupaebi ata tsanetsi, itsiata jitsipajë xaniavaetsia ajamatabëcuenesaëya patanenamuxunaevetsinexamë. 2 Bjarapacuenia pacanavajunupaebijitsiatsi tsipaji bitso pacaasivatsi pacuenia Dioso pacaasiva. Pacatojitsipatsi ëCristo panejitsipaenexa. Pacuenia petiriva caenë jitsipa ëpamonanexa, bjarapacuenia caenë Cristo pajitsipare. 3 Bajayata Evapijiva yamaxëitojorobatsi dovathi penajumetsënëtsicueneta. Pacacacujunavatsi

paxamë ata bajarapacuenia dovathi papecayamaxëitojorobianiva. Nexata paxamë yabara jamatabëjumaitsinë mapacueniaje: “Dovathi meta jamatabëcuenebijianaenatsi Corinto tomarapijivi. Cristo meta pejitsipaejavami copabiana,” jamatabëjanë paxamë yabara.

<sup>4</sup> Pacacacujunavatsi penajumetsënëtsilivaisi petsipaebaponaevi papecatsipaebianiva. Tsipaji bajarapamonae pata baja paxamëjavata. Xanë Jesús pelivaisi pacatsipaebabiabatsi. Nexata Jesús pelivaisivecua bajarapamonae saicayacuenia pacatsipaebabiabi ata, itsiata bajarapalivaisi panamuxunaevetabiabame xaniavaetsia. Espíritu Santo, ponë pacatsijamatabëeca, pelivaisi, xanë pacatsipaebabiabatsi. Nexata Espíritu Santo pelivaisivecua saicayacuenia bajarapamonae pacatsipaebabiabi ata, itsiata bajarapalivaisi ata panamuxunaevetabiabame xaniavaetsia. Xanë pacatsipaebabiabatsi pexanialivaisi papecacapanepaelivaisinexa Diosojavelia. Nexata bajarapalivaisivecua bajarapamonae saicayalivaisi pacatsipaebabiabi ata, itsiata panamuxunaevetabiabame xaniavaetsia.

<sup>5</sup> Pamonaevi penajumetsënëtsilivaisi pacatsipaebabiaba, ayaijamatabëcuenevi nataeyabiaba. Paxanë paapóstolevinë bajarapamonae bitso panevecuaayaijamatabëcuenevi natane. Itsiata baitsi jane xanë bajarapamonaevecua beveliajamatabëcuenenënë apo nataenë.

<sup>6</sup> Jivijavelia xaniavaetsia livaisi tatsipaebinexa, apo necujani ata, itsiata xaniavaetsia yapëtaniji xua yabara tsipaebajë. Xaniavaetsia Jesús pelivaisi patayapëtaejava paneyapëtaenexa,

pacatsitanajamatabëcuene itajëtabiabatsi  
paxamëjavata itsa pacatsipaebavanapatsi Jesús  
pelivaisi.

<sup>7</sup> Paxamëjavata itsa pacatsipaebaponaponatsi  
pexanialivaisi papecacapanepaelivaisinexa  
Diosojavabelia, itsacuenejavayo ata  
paxamëjavabelia apo pacavajëtsitsi. Xanë  
tacobeta asaëyata nacuenebabiabajë  
tanaevetsinexa. Bajarapacuenia betajiobicuenia  
nacuenebabiabajë tanaevetsinexa pamatacabi  
pacatsipaebaponaponatsi Jesús pelivaisi.  
Nexata baja pajumecovënëtame Jesús pelivaisi  
itsamatacabi panexainaenexa matacabi  
apo pevereverecaejava. <sup>8</sup> Itsamonae Dioso  
pejumecovënëtsivi itsa netoitoroba palata, itsiata  
pitajë paxamëjavata tanaevetaponaponaenexa  
bajarapapalatata. Nexata pacayavenon-  
aponaponatsi. Bajarapacuenia paxamëjavata  
naevetaponaponajë. Paxamë apo panerajutsimë  
palata. <sup>9</sup> Nexata pamatacabi paxamëjavata  
ponaponajë, namatavenonae atanë, apo  
pacavajëtsitsi panexainaeyajuvënëjava patan-  
erajutsinexamë. Itsiata Dioso pejumecovënëtsivi,  
Macedonia nacuaverena pepatsivi, netocapata  
daxita tanamatavenonaejava. Bajarapacuenia  
paxamëjavata ponaponajë itsacuenejavayo ata  
pacavajëtsinejevatsi patacajamatabëitonotsiyaniva.  
Apo najamatabëxainaenë bexëajavabelia  
ata patacavajëtsinexa. <sup>10</sup> Yapëtaniji Cristo  
pelivaisi pepacuene pexaniajailivaisicuene.  
Bajaraxuata daxita Acaya nacujava Cristo  
pelivaisi amoneya asaëya tatsipaebaponaejava,  
sivajamatabëcuenebarëyanë. <sup>11</sup> Itsamonae

xanë yabara jamatabëcuenenavëxaniabiaya pacajumaitsi: “Pablo raja apo pacaasiva. Bajaraxuata apo pacavecuapitsi palata,” pacajai. Jemajai raja bajarapamonae. Dioso raja yapètane bitso patacaasivajava.

<sup>12</sup> Itsiata tavajënaeyabelia Dioso pejumelivaisi pacatsipaebaponaenatsi pacavajëtsinejevatsi itsacueneyavayo ata. Pamonae penajumetsënëtsilivaisi pacatsipaebabiaba, bajarapamonae pacamatamoyanijobabiaba papecatsipaebimatamo. Bajarapacuenia papecamatamoyanijobabiabixae, nexata toacuenebitsi pevajënaeyabelia papecajumaitsaponaenexa: “Paxanë ata patonacuenebavanapajë Dioso pacuenia Pablo tonacuenebaponapona Dioso,” papecajainexa. <sup>13</sup> Bajarapamonae apo pepo apóstolevi. “Paxanë raja paapóstolevinë,” itsa pacajai, saya raja pacayamaxëitojoroba. Paxanë Cristo papijajivinë, paapóstolevinë, bajarapamonae saya panecuenecataeya apóstolevi naexana. <sup>14</sup> Paxamë apo bepasivajamatabëcuenenabenajacaemë bajarapamonae. Bajarapacuenia saya bajarapamonae exanavanapa papecayamaxëitojorobinexa. Dovathi raja caëjëpatsi Dioso bepijaàngelnë penaexanaenexa, bepexaniajailivaisi itajara petsipaebinë jivi petaenexatsi. <sup>15</sup> Nexata dovathi pijajivi ata pexaniacuene itajara exanavanapae ata, itsiata apo besivajamatabëcuenenabenajacaetsi. Paneconivajëto bajarapamonae xaina, bajarapaneconivajëtota itsamatacabi Dioso naneconitsiaexanaena bajarapamonae.

*Pacuenia Pablo apóstolenēxae nabejibitsiapon-  
apona yabara pelivaisi*

<sup>16</sup> Icatsia pacajumaitsitsi. Xua aeconoxae pacajumai tsanetsi, bajaraxua yabara pētsa panetaneme betanematajemabinē. Bajarapacuenia panetae atamē, itsiata panenamuxunaevere palivaisi pacatsipaebi-jitsiatsi. Pacuenia peyamaxēitojorobiapóstolevi ajumeurajibia pacanavajunupaebabiaba paneyaiyataenexa, bajara pijinia pacuenia xanē ata ajumeurajibia pacanavajunupaebijitsiatsi pataneyaiyataenexamē. <sup>17</sup> Vajatuxanenē picani apo nitorobi patacanavajunupaebinexa. Itsiata pacuenia pematajemabinētsi ajumeurajibia banavajunupaeba xua exana, bajarapacuenia xanē ata aeconoxae ajumeurajibia pacanava-junupaebijitsiatsi pataneyaiyataenexamē.

<sup>18</sup> Pamonaē peyamaxēitojorobiapóstolevi, ayaijamatabēcuenevi nataeyabiaba. Nexata ajumeurajibia pacanajamatabēcuene vajunupaebabiaba bajarapamonaē. Nexata xanē ata bajarapacuenia ajumeurajibia pacanajamatabēcuene vajunupaebijitsiatsi. <sup>19</sup> Paxamē bitso ayailivaisi bepaneyapētaevi panataneme. Itsiata apo payapētaemē. Tsi-paji saya jamatabēcuenebarēyaya panamuxunaevetabiabame palivaisi pacatsipaebabiaba peyamaxēitojorobiapóstolevi. Pacuenia pematajemabinētsi ajumeurajibia banavajunupaeba xua exana, bajarapacuenia ajumeurajibia pacanavajunupaebabiaba peyamaxēitojorobiapóstolevi. <sup>20</sup> Bajarapamonaē bepapijajivitonēmēcuenia pacaitorobabiabi ata, itsiata xaniavaetsia panamuxunaevetabiabame.

Panexainaejavaxi pacavecuaveretaponae ata, itsiata xaniavaetsia panamuxunaevetabiabame. Bijiaya pacanaëcotabiabi ata, itsiata xaniavaetsia panamuxunaevetabiabame. Pacaitabara-pacababeyabiabi ata, itsiata xaniavaetsia panamuxunaevetabiabame. <sup>21</sup> Paxanë bajarapacuenia apo pacaexanaetsi pamatacabi pajinavanapajë paxamëjavata.

Xua yabara bajarapamonae ajumeurajibia pacanavajunupaebabiaba, xanë ata necaëjëpa bajarapitsicueni yabara ajumeurajibia patacanavajunupaebinexa pataneyaiyataenexamë. <sup>22</sup> Bajarapamonae ayaijamatabëcuenevi nataeya itsa pacanavajunupaebabiaba, pacajumai tsabiabi paneyaiyataenexa: “Paxanë raja pajudíovinë,” pacajai tsabiabi. Xanë ata raja judíonënë. Itsiata bajarapacuenia apo pacajumaitsitsi pataneyaiyataenexamë. Bajarapamonae pacajumai tsabiabinua: “Paxanë raja Israelpijinë papemomoxinë,” pacajai tsabiabi. Xanë ata raja Israelpijinë pemomonë. Itsiata bajarapacuenia apo pacajumaitsitsi. Bajarapamonae pacajumai tsabiabinua: “Paxanë raja Abrahampijinë papemomoxinë,” pacajai tsabiabi. Xanë ata raja Abrahampijinë pemomonë. Itsiata bajarapacuenia apo pacajumaitsitsi. <sup>23</sup> Bajarapamonae Cristo bepijajivi nataeya ajumeurajibia pacanavajunupaebabiaba. Xanë xaniavaetsia Cristo tonacuenebaponaponajë. Xanë picani apo jitsipaenë patacanavajunupaebinexa. Itsiata Cristo tatonacuenebaponaponaejava, xanë ajumeurajibia pacanavajunupaebijitsiatsi.

Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebijitsiatsi. Itsiata mapacuenia pacanavajunupaebijitsiatsije. Xanë bitso Cristo tonacuenebaponaponajë bajarapamonae matatoxenetsia. Bajarapamonae matatoxenetsia xanë bitso nejumaconibabeyabiaba penaneconitsivi pejumaconibabeyabiabimacata. Bajarapamonae matatoxenetsia nenaneconitsiaexanabiaba penaneconitsivi pejebabiabibota taneetsinexa. Bajarapamonae matatoxenetsia anijatonë imoxo tanebeyaxuababiabi. <sup>24</sup> Cinco xuabeje judíovi nevaetaba tanenaneconitsiaexanaenexa. Caenevaetabi canacujitsia nejumaconibabeyabiaba penaneconitsivi pejumaconibabeyabiabimacata. Itsa nejumaconibabeyabiaba, treinta y nueve xuabeje nejumaconibabeyabiaba caenevaetabita. <sup>25</sup> Acueyabi icatsia xuabeje apo judíovi nevaetaba tanenaneconitsiaexanaenexa. Bajaraxuanë saicaya naebota nejumaconibabia. Icatsia itsamatacabijavabelia caeto judíovi ibotonëta netsecona. Acueyabi pijinia panamutobeje menia barcota tanaponaejavata, acueyabi xuabeje nayabubunajë manuameneta. Caepayajopaetanë, caemeravi, caematacabi yajava, manuameneta juenajetarucajë. <sup>26</sup> Xanë ayaicuenia jinarutabiabajë Cristo pelivaisi jivi tatsipaebaponaenexa. Nexata itsajavata netsiayai tsabiabi menia taponabiabijava. Itsajavata namutua itsa ponajë, netsiayai tsabiabi tanevecuanacobetoxotsinexa tacobecovëjavaxi. Itsajavata netsiayai tsabiabi tajanacuapijivi

taneitsacueniabinexa. Itsajavata netsiayai tsabiabi saicayanacupijivi taneitsacueniabinexa. Itsajavata netsiayai tsabiabi tomaranēja, petusato nacuanēja ata, manuamenejava ata. Itsajavata netsiayai tsabiabi pamonajava Dioso bepejumecovēnsivi penataevijava.<sup>27</sup> Itsajavata bitso nacuenebabiabajē. Cueranabiabajēnua. Itsajavata apo majitabiabinē. Itsajavata bitso tajani tsabiabi. Meranua jiitsipabiabajē. Itsajavata taxaejava xaenejevanē ponaponabiabajē. Itsajavata bitso aquenē tsabiabi apo taxainaexae tanaxatatsijava.

<sup>28</sup> Bajaraxua icatsia pematatsēnēa mapacuenēje. Caematacabi canacujitsia bitso sivanajamatabēxainabiabajē caetomarapijivi canacujitsia, Dioso pejumecovēnsivi.<sup>29</sup> Pajivi jamatabēcuenecuerana Dioso pejumecovēnsijava, xanē ata sivajamatabēcuenecueranabiabajē. Pajivi itsajivi pejamatabēcueneta pibisiacue exanaeyaexanatsi pejopaenexa Dioso pejumelivaisivecua, bajarapajivi yapijiviauranē tsabiabi Diosojavabelia. Baraanaepanabiabajēnua pajivi pejamatabēcueneta jopaeyaexanatsi.<sup>30</sup> Itsajivi itsa nitoroba tanajamatabēcuenevajunupaebinexa, nexata najamatabēcuenevajunupaebianajē tanajamatabēcueneitajētsinexa taja-matabēcuenefaenajava.<sup>31</sup> Vajatuxanenē Jesucristo paxa Diosojavabelia pexaniajamatabēcuenē berajutabiabatsi dexitamatacabijavabelianexa. Dioso baja cajena yapētane jivi tatsipaebilivaisi pexaniajaicuene.<sup>32</sup> Imata ponaponajē Damasco tomarata. Nexata pepo iravetsinē, Aretasvēnēnē, eveta bajarapaira. Nexata pijajivitonē eveta

Damascotomara. Damascotomara matatoyorotsia yacaranata piaitayaëibopanaxanetota. Bajara payacaranatsijavaxaneto ibopananë mataropotsia catsanaeya pefaratsijava. Bajaraxua apia athëbëabetsia pacuenia pinijinaejavaxaneto apia. Nexata Damascotomara pevetsinë pijajivi itoroba tanevajënaeevetsinexa pabaupajava pitsapaejitsianë picani bajarapatomaravecua. Bajaraponë itoroba pijajivi tanevaetabinexa tanecaponaenexa picani penaneconitsivi pejebabiabiboyabelia. <sup>33</sup> Itsiata baitsi jane itsamonae Dioso pejumecovënëtsivi bemapirecuenia pexanaejavaxanetoënëta neecaeyaexana. Nexata Damascotomara matatoyorotsia peyacaranatsi ibopanaxanetojumabelia neyamaëyacopareca athëbëyo perucaeventanavojotualia. Bajarapacuenia Damasco tomarata vecuapanepajë Damascotomara pevetsinë pijajivi.

## 12

*Pacuenia Pablo navajunupaeba bemajitsinaebota vajatuxanenë petsitanaitajëtabiabijavatsi yabara pelivaisi*

<sup>1</sup> Apo netsitaxanepanae picani ajumeurajibia patacanavajunupaebinexa. Itsiata baitsi jane pamonaë peyamaxëitojorobiapóstolevi, ajumeurajibia pacanavajunupaebabiaba saya paneyaiyataenexa. Nexata xanë ata ajumeurajibia pacanavajunupaebatsi bemajitsinaebota vajatuxanenë Jesucristo tanetsitanaitajëtabiabijava. Neyapëtaeyaexananua pajamatabëcuenelivaisi xaina xuanë ata

netsitajëtabiaba. <sup>2-3</sup> Catorce pavaibeje xainajë tanecapanepaecujinae athëbëabetsia Dioso pijanacuayabetsia. Apo nayapëtaenë athëbëabetsia tanecaponaejava taperabëto yajava. Itsa jume, ëtajamatabëcuene meta saya capona. Caenë Dioso yapëtane pacuenia necapona athëbëabetsia. <sup>4</sup>Itsiata necapona paraísojavabetsia. Bajarajotatsia jumetaniji Dioso muetsia pexainabuatsilivaisi. Bajarapalivaisi Dioso apo netocopatsi tatsipaebinexa itsajivi ata. <sup>5</sup>Bajarapacuenia athëbëabetsia tanecaponaejava tanavajunupaebbinexa, necaëjëpa picani jivi taneyaiyataenexa. Itsiata apo navajunupaebabiabinë tsane bajaraxua. Ètasaëjibijava saya navajunupaebabiabianajë. <sup>6</sup>Ayailivaisi picani xainajë ajumeurajibia tanavajunupaebaponaenexa pacuenia taniji athëbëtatsia. Ajumeurajibia itsa navajunupaebaponaejitsipajë, apo navajunupaebaponaenë tsipae betanematajemabinëcuenia. Tsipaji ëpexaniajailivaisi navajunupaebaponaejitsipajë. Itsiata baitsi jane apo navajunupaebaponaenë tsane daxita xua yapëtaniji. Tsipaji apo jitsipaenë bajarapalivaisita jivi taneyaiyataenexa. Biji rajane jitsipajë jivi taneyaiyataenexa taexanaponaejava yabara, livaisi tatsipaebaponaejava ata yabara.

<sup>7</sup> Dioso netocopata tanavixaetaeyabinexa. Bajarapacuenia Dioso netocopata tanavixaetaeyabiabinexa tajacuata tanabarajamatabëjumaitsiyaniva mapacueniaje: “Xanë baja cajena pinijicuene Dioso netsitajëtabiaba xua itsajivi ata apo tae. Bajaraxuata bitso

xanë ayaijamatabëcuenenënë daxitajivi matatoxenetsia,” tanabarajamatabëjaiyaniva, Dioso netocopata tanavixaetaeyabiabinexa. Dioso netocopata dovathi pejamatabëcueneta tanevixaeitonotabiabinexa daxitamatacabi. <sup>8</sup> Dioso javabelia picani vajëtajë acueyabi xuabeje tanevecuaajibiaexanaenexa bajarapavixae. <sup>9</sup> Itsiata baitsi jane vajatuxanenë nejumlahitsi mapacueniaje: “Jume. Apo cavecuaajibi-aexanaetsi tsane. Bitso casivatsi. Nexata cayavenonaenatsi daxita xua namatavenoname. Pajivi apo jamatabëcuenecaëjèpae atatsi pesaëta tanetonacuenebinexa tajacuene, itsiata baja itsa caëjèpatsi tanetonacuenebinexa, nayapëtane tayavenonaecuene,” nejai vajatuxanenë. Bajaraxuata vajatuxanenë pijacuene tatonacuenebinexa, xanë tasaëta apo tanejamatabëcuenecaëjèpaejava, nasivajamatabëcuenebarëyanë. Tsipaji Cristo pesaëta neyavenonabiaba daxitacuene yabara. <sup>10</sup> Apo tanejamatabëcuenecaëjèpaeaxae tasaëta tatonacuenebinexa vajatuxanenë pijacuene, nasivajamatabëcuenebarëyanë tsabiabi. Itsamonae pibisiacuenia itsa nebijataeyabiaba Cristo pijajivitonëxaenë, nasivajamatabëcuenebarëyanë tsabiabi. Itsacuenëjavaxi itsa namatavenonabiabajë, itsiata nasivajamatabëcuenebarëyanë tsabiabi. Itsamonae itsa nebejiobiaexanabiaba Cristo pijajivitonëxaenë, itsiata nasivajamatabëcuenebarëyanë tsabiabi. Itsa netsiayapëbeje tsabiabi tatonacuenebinexa Cristo pijacuene, itsiata nasivajamatabëcuenebarëyanë tsabiabi.

Tsipaji paepatota apo nejamatabëcuenecaëjêpae, bajarapaepatota vajatuxanenë bitso nejamatabëcueneyavenonabiaba.

*Pacuenia bitso Pablo sivanajamatabëxaina Dioso pejumecovënëtsivi, Corinto tomarapijivi, yabara pelivaisi*

<sup>11</sup> Pamonaë peyamaxëitojorobiapóstolevi, saya jivi peyaiyataenexatsi ajumeurajibia navajunupaebabiaba pacuenia pematajemabinëtsi banavajunupaeba ajumeurajibia. Bajarapacuenia xanë ata navajunupaebajë. Apo jitsipaenë picani tanavajunupaebinexa. Paxamë xaniavaetsia itsa panevajunupaebijitsipame pacuenia exanaponaponajë paxamëjavata, nexata xanë tajacuata apo navajunupaebinë tsipae. Beveliajamatabëcuenenë atanë, itsiata pamonaë peyamaxëitojorobiapóstolevivecua, xanë apo beveliajamatabëcuenenënë. <sup>12</sup> Paxamëjavata itsa ponaponajë, netsiayapëbeje ata, bajayajebi pacatsitaexanaponaponatsi pacuenia Dioso nitoroba. Pacatsipaebaponaponatsi Jesús pelivaisi. Nexata pacatsitaexanabiabatsi pinijicuene taexanaejava Dioso pesaëta. Nexata paneyapëtaneme Dioso taneyavenonabiabijava. <sup>13</sup> Pacuenia taniji daxita Dioso pejumecovënëtsivi, bajarapacuenia paxamë ata pacatanetsi. Nexata itsamonae Dioso pejumecovënëtsivivecua bepaveliajamatabëcuenevimë, apo pacataetsi. Itsamonae Dioso pejumecovënëtsivi, neyavenonabiaba itsajota namatavenonajë. Itsiata bajarapacuenia paxamë ata pataneyavenon-aenamë, apo pacavajëtsitsi. Pamatacabi

ponaponajë paxamëjavata, apo pacavajëtsitsi itsacuenejavayo ata. Pëtsa itsiata bajaraxua pasivanajamatabëxainame. Biji rajane pasivajamatabëcuenebarëyamëre itsacuenejavayo ata apo patacavajëtsijava.

<sup>14</sup> Mabaja panamutotaje, acueyabi namuto taponae nexa paxamëjavabelia naxaniavae-taponaponajë baja. Itsiata apo pacamata-moyanijobi tsanetsi Dioso pejumelivaisi patacatsipaebimatamo. Tsipaji palata apo jitsipañë. Jitsipajë rajane xaniavaetsia panejumecovënëtsinexa Dioso. Bepataximë pacatanetsi. Pacuenia pejevaxi paxajavabelia apo rajutsi palata paxa penaevetsinexa, bajara pijinia pacuenia paxamë ata apo panerajutsimë palata tanaevetsinexa. <sup>15</sup> Xanë patacayavenonaenexa, mapacuenia exanaejitsipajëje. Daxita taxainaejavami, veretsipajë jamatabëcuenebarëyaya. Tasaëtsaponaponaeeptojebi abaxë mapanacuataje, pacayavenonabiabijitsipatsi. Bajarapacuenia pacayavenonabiabijitsipa patacjamatabëcueneyavenonaenexa, xaniavaetsia Dioso panejumecovënëtsinexa. Tavajënaeyabelia bitso pacaasiva tsaponae atatsi, itsiata covë paxamë juya bevelia saya paneasivamë tsaponae.

<sup>16</sup> Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabi: “Xaniajai. Vaxaitsi Pablo apo rajutsitsi palata, Dioso pejumelivaisi vajanacatsipaebimatamo. Itsiata Pablo piaitatsacanë. Nexata meta itsacuenia nacayamaxëitojorobiaya nacavecuap-itabiaba palata,” jai tsabiabi itsamonae xanë yabara. <sup>17</sup> Itsanë ata cajena, paxamëjavabelia

xanë taitorobiviyajuvënënë, yamaxëitojorobiaya palata apo pacavecuapitsi. <sup>18</sup> Itorobajë baja Tito peponaenexa paxamëjavabelia papecataenexa. Itorobajënuua itsanë Dioso pejumecovënëtsinë Tito peyajavaponaenexa. Nexata pamatacabi Tito ponapona paxamëjavata, ¿pacavajëta tsaja palata? Jume. Apo pacavajëtsi cajena. Paxanëbeje Titobeje panajamatabëcuenejëpajëbeje. Nexata panacuenejëpajëbeje.

<sup>19</sup> Panesivajamatabëjumaitsimë raeta: “Bajarapacuenia Pablobana nacanajamatabëcuenelivaisipaeba saya penayajivicuaicuaijainexa vaxaitsi vajananeconitsiaexanaeyaniva,” panesivajamatabëjamë raeta. Bajarapacuenia itsa pacanavajunupaebatsi, apo pacanavajunupaebitsi patacujunavixae patanenaneconitsiaexanaejavamë. Pacatsipaebatsi raja Dioso pitabarata pacuenia Cristo panetojitsipa. Tajamonae bitso patacaasivavi, daxita palivaisi baja pacatsipaebabiabatsi, pacatsipaebabiabatsi patacajamatabëcuene yavenonaponaenexa. Nexata bajarapalivaisi panevajënaeyabelia pacatsijamatabëvitsabaponaena Dioso papijajivixaemë. <sup>20</sup> Pamatacabi ponaenajë paxamëjavabelia, bitso meta najamatabëxainaeya patsianajë paxamëjavata. Aeconoxae pajitsipame tapatsinexa paxamëjavata. Itsiata meta itsa patsianajë paxamëjavata, apo pajitsipaemë tsane patacananeconitsiaexanaenexa. Tsipaji meta apo pacacaxitarabi tsanetsi pexaniacuenia panejinavanapaejavata pacuenia pacatojitsipatsi. Itsa patsianajë paxamëjavata, pacataenatsi meta panenajumeanaenotabiabijava. Pacataenatsi

meta panenacaëbabiabijava ata. Pacataenatsi meta panenabaraanaepanabiabijava ata. Pacataenatsi meta apo paneyavenonaejava itsajiviyo ata. Pacataenatsi meta itsamonae pepëya pibisiacuena najumetsënëtsia panebaracuaicuajaitsabiabijava ata. Pacataenatsi meta itsamonaevecua paayaijamatabëcuenevimë panenataeyabiabijava ata. Pacataenatsi meta apo panenajamatabëcuenejëpaexae navecuanatsanaeya panejinavanapaejava ata. <sup>21</sup> Paxamëjavata icatsia itsa patsianajë, Dioso meta pitabarata pacayapijivaura tsanetsi pibisiacuene paneexanavanapaejava yabara. Bajaraxuata bitso pacasivanajamatabëxainatsi icatsia patacataenexalia. Tsipaji itsa apo pajinavanapaemë tsane pacuenia pacaitorobatsi, patacasivajamatabëcuenebarëyajavami, nevecuaajibi meta tsane. Paxamëyajuvënëvi bajayatajavav-erenacujinae pibisiacuene pexanavanapaexae, sivajamatabënuenajë. Bajarapamonae pibisiacuene pexanavanapaejava pevitota, apo sivajamatabëcuenebëjai. Apo jamatabëcopatsinua pibisiacuene pexanavanapaejava pevitota.

## 13

*Pacuenia icatsia Pablo itaveta Corinto tomara-pijivi Diosojavabelia penaneconitsiyanima yabara pelivaisi*

<sup>1</sup> Aeconoxae baja icatsia ponaejitsianë paxamëjavabelia acueyabi namutonexa. Pibisiacuene pexanaejivi yabara, Dioso pejumelivaisibaxutota jumaitsi mapacueniaje: “Pajivi pibisiacuene exana, xanepana pevajunupaebinexatsi

anijajivibeje, acueyabi pajivibeje ata, petaevitsi. Nexata xuacujinae xanepana jane baja penaneconitsiaexanaenexatsi,” jai Dioso pejumelivaisibaxutota. Nexata paxamëjavabelia itsa patsianajë, bajarapacuenia xanë pacananeconitsiaexanaenatsi. <sup>2</sup> Imata panamutomi pacaitavetatsi daxita paxamë pibisiacuene paneexanavanapaejava panecopatsinexa, Diosojavabelia panenaneconitsiyaniva. Bajarapacuenia itavetajë itsamonae ata pibisiacuene pexanavanapaeyaniva. Aeconoxae tajë pacavecuaponaponae atatsi, pacatoyaquinatsi icatsia patacaitavetsinexa pibisiacuene paneexanaeyaniva. Icatsia paxamëjavabelia itsa patsianajë, pacananeconitsiaexanaenatsi padaxitamë. Caejivi ata apo bejiobiataenë tsane pibisiacuene pexanaeneconi yabara. <sup>3</sup> Itsa pacananeconitsiaexanaenatsi, ajumesaënë tsane patacananeconitsiaexanaenexa. Nexata bajarajota xaniavaetsia paneyapëtaename tayajavacuaicuaijaitisabiabijava Cristo. Cristo baja cajena piamatabëcuenesaëjava, pacatsitanajamatabëcueneitajëta itsa pacayavenonaponona paxamëjavata. <sup>4</sup> Xaniajai rabaja. Pacuenia vaxaitsi mapanacuapijivitsi ajamatabëcuenesaëjibitsi, bajara pijinia itsi Cristo ata mapanacuata itsa naexana pacuenia vaxaitsi banaexanatsi. Nexata Cristo cruzata itsa beyaxuabatsi, Dioso pesaëta icatsia asaëyaexanatsi petëpaecujinae. Paxanë pajamatabëcuenesaëjibi atanë, itsiata aeconoxae Dioso pesaëta Cristo payajavajinavanapajë patacjamatabëcueneyavenonaenexa.

<sup>5</sup> Jica jane. Panajamatabëcuenelivaisiëjère

itsa xaniajai pepacuene Cristo papijajivimë. Itsa pepacuene Cristo papijajivimë, nexata payapëtaename Cristo papecayajavaponaponaefava. Itsa Cristo apo papijajivimë, nexata Cristo apo pacayajavaponaponaef. <sup>6</sup> Paxanë pajamatabëjumaitsinë paxamë yabara mapacueniaje: “Corinto tomarapijivi vaxaitsi itsa nacacuenecanaëjëtsiana, xaniavaetsia yapëtaena pepacuene Cristo pijajivicuenetsi,” pajamatabëjanë. <sup>7</sup> Pacatovajëtafonatsi Diosojavabelia pibisiacuene paneexanaponaeyaniva. Bajarapacuenia itsa pacatovajëtafonatsi Diosojavabelia, itsajamatabëcuene apo pacasivanajamatabëxainaetsi. Nexata apo pajamatabëjumaitsinë paxamë yabara: “Itsa bajarapamonae xaniavaetsia jinavanapaena, nexata pijinia daxitajivi nacayapëtaena pepacuene apóstolevicuenetsi,” apo pajamatabëjanë paxamë yabara. Bajarapacuenia Diosojavabelia pacatovajëtatsi tsipaji pacatojit-sipatsi ëpexaniacuene paneexanavanapaejava. Xaniavaetsia itsa pajinavanapaename, nexata itsa papatsianajë paxamëjavabelia, ajibi tsane patacayabarananeconitsiaexanaefava. Pacuenia Cristo panetocopata patananeconitsiaexanaenexa pijaneconi pexainaevi, bajarapacuenia apo pacaexanaetsi tsane. <sup>8</sup> Tsipaji acuenebi patananeconitsiaexanaefava pajivi baja jumecovënëta pexaniajailivaisi, Jesucristo pelivaisi. Pananeconitsiaexanaenajë ëpijaneconi pexainaevi. <sup>9</sup> Aneconijibia itsa pajinavanapaename, acuenebi patacananeconitsiaexanaenexa. Itsiata pacasivajamatabëcuenebarëyatsi. Tsipaji

apo paxainaemë paneconi yabara pacananeconitsiaexanaejitsiatsi. Pacatovajëtaaponatsinua Diosojavabelia panevajënaeyabelia panejamatabëcuenevitsabaponaenexa Dioso panejumecovënëtsijava. <sup>10</sup> Pacatoyaquinialiat si mapabaxutoje taponaevajënaeya paxamëjavabelia tavajënaelia panenajamatabëcuenexanebinexa pibisiacuene paneexanaejavavecua. Nexata ita patajopaeliajë paxamëjavabelia, apo pacabijatae tsanetsi. Apo pacananeconitsiaexanaetsinua tsane. Dioso nitoroba patacaevetsinënexa. Nexata ita patsialiajë paxamëjavabelia, apo jitsipaenë tsane patacananeconitsiaexanaenexa. Biji rajane jitsipajë patacajamatabëcuene saëyaexanaejava panevajënaeyabelia paneajamatabëcuenesaënexa Dioso panejumecovënëtsijava.

<sup>11</sup> Tajamonae, pajamatabëcuenebarëyamëre tsavanapae. Panevajënaeyabelia panajamatabëcuene vitsabiaexanaponare Dioso panejumecovënëtsijava. Panamuxunaevere palivaisi pacatoyaquinialiat si. Najamatabëcuenejëpaeya pajinavanapare jamatabëcuenexanepanaeya. Dioso vajanacaasivanë. Bajaraponë jamatabëcuenexanepanaeya nacajinavanapaeyaexana. Nexata Diosojavabelia pacatovajëtabiabatsi Dioso papecayajavaponaponaenexa. <sup>12</sup> Paxamë ata Dioso panejumecovënëtsixae, xaniavaetsia nasivaya namataenetsia panabajacobabiabare. <sup>13</sup> Daxita pamonaë Dioso pejumecovënëtsivi, majota pejinavanapaevije, pacabajacobalia.

<sup>14</sup> Pacatovajëtabiabatsi Diosojavabelia vajatuxanenë Jesucristo papecayavenonabiabinexa. Pacatovajëtabiabatsinua itsamonae ata asivaya

panetaenexa pacuenia paxamë ata Dioso  
pacaasiva. Pacatovajëtabiabatsinua Espíritu Santo  
ata papecayajavaponaponaenexa.

**Dios pejumelivaisibaxuto  
pejanalivaisibaxuto  
New Testament in Guahibo**

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Guahibo

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 11 Nov 2022 from source files  
dated 29 Jan 2022

bc03f416-faf8-5000-bfb5-5ca8a3fa98cf